

## **ASO TOFI, 25 FEPUARI 2021**

*Na toe faaauau Taulumaga a le Fono Aoaofaitulafono i le itula e 6:11 i le afiafi.*

*Na toe faaauau felafolafoaiga ma Tali a le Malo i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**SUI FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofaitulafono.

Ia, o upu lava e masani ai, o Samoa o le atunuu mamala. E ui lava ina vavalalata le taeao ma le afiafi ae e i ai le maatui ma le maagao ma le maa e faalavea i lo outou aao. Ona i ai lea o le agaga e faafetai ua tatou feiloai i nuu o manaia.

E faafeiloai ma faatalofa foi i lenei vaega o le afiafi i lau Afioga i le Palemia faapea foi le Aiga Kapeneta, Minisita Lagolago ma le paia maualuga o sui usufono mamalu uma o le Palemene, malo usufono, malo foi le onosai.

E faapea foi ona afe se matou faamatalaga e faatalofa i Ofisa Sili o Pulega o Matagaluega a le Malo faapea foi i Faalapotopotoga Tumaoti. Faafetai le onosai mai, o le tatou galuega e fai faatasi. Malo le faamalolosi.

Ia, o le faafofogaaga a Samoa i lau tapuaiga, e le galo, malo le tailau i lenei aso, aemaise o le faagaloina o lau Palemene, a o lea e alo i lana Fonotaga i la outou tapuaiga. Ui o lea, tapuai maia ma le manuia ae se i alo le Palemene e saili manu o lenei afiafi.

E faataatiaese Galuega a le Fono Aoaofaitulafono i le aoauli analeila, o lo o saunoa talifuaitau le Afioga i le Minisita o Faatoaga ma Faigafaiva, ou te tapa ai ma le faaloalo lau Afioga i le Minisita, tulai mai e faaauau lau saunoaga.

**Tofa Hon LOPAOO NATANIELU MUA:** Ou te manatu o lea ua uma ona e faaee le taulaga faafetai i lenei ituaso, e le gata i le Maota nei, a o le faafofogaaga a le tatou atunuu aemaise o le tatou Tama o i le Lagi o le pule i mea uma. Ae o le a vili sao le ifi a Maina ma tuusao le malama e pei ona i ai le faamoemoe o lenei afiafi. E fai le tatou malologa ua oo atu le folasaga a lenei Matagaluega i le tatou Fale Suesue i Nafanua o le Scientific Research

Organisation of Samoa. E pei ona silafia, na talosagaina e le Matagaluega lenei le tatou Fale Suesue, i le tele o oloa sa mafai ona suesueina ma faatino ma maua, pe i ai ni kamupani e mafai ona latou faatinoina le gaosia. Peitai, e i ai nisi o vaega laiti sa mafai ona faamatuu atu, ae o le taimi nei o lo o faapea ona lelei ona fai, e pei o suauu ia e maua mai i fetau, suauu e maua mai le mosooi ma le tele o suauu ma isi suauu e maua mai i le popo. A o le tele o vaega o nisi o suesuega, sa le mafai ona maua i latou e fiafia pe i ai se latou sauniuniga e gaosi. E pei o le faataitaiga o le uisiki, o le avoka, suauu lea e maua mai le avoka - avocado oil, o le falaoamata lea e tau o le gluten free flour e maua mai i le ulu. Na mafua ai ona faia se talosaga a le Matagaluega a le Fale Suesue i le tatou Malo, po o le a se finagalo ae aumaia se avanoa e fai ai pea e se kamupani ma pulea ma faafoe e le tatou Fale Suesue ma lana Pulega, po o se vaega foi lele o le extension o le tatou galuega o lo o faia i Nafanua. Na talia ma tuuina mai ai le tupe e \$2,500,000 e faatino ai lea galuega ina ua uma ona suesue e le tatou Fale Suesue ma le latou fono faatonu, le Taitaifono ma le Komiti ma le Pulega, faatasi ai foi ma nai fautuaga e avatu i le Pulega o Faatoaga ma Faigafaiva i le mea e tatau ona fai. Ua tusi ata i se tasi o malaga na matou malaga ai i Siamani i le fonotaga sa faia i Berlin, na maua ai foi ma le avanoa matou te asiasi ai i se tasi o kamupani ua ova i le 300 tausaga o latou faia masini, Distillers e gaosi ai le uisiki. O lenei la lea ua uma ona fai ai loa ma le polokalame ma aumai le faataatiaga ma le layout o le mea e manaomia ona fausia ai lea o le fale lea. Ma ua uma nei ona faavae le fale ua alu i luga, toe o se... i totonu o le 3 vaiaso pe a, e fuafua i le vaai pe a faapea e le tetele timuga, ona amata lea ona alu i luga le iviivi. Ua faatino le galuega lea i totonu o le tatou laufanua i Nafanua. E i ai foi ma le faamoemoe o le a faaigoaina le kamupani lenei po o le commercial arm o le SROS o le Nafanua Pure Products Limited – NPP. Ua uma ona tatala aloaia e le Afioga i le Palemia ma o matou tagata ma ua faatino ma ua toe o se aga, atonu e oo atu i le masina o Me, ua amata ona faapipii uma totoga o masini. E le gata i le uisiki, o le mea e fai ai le falaoamata e maua i le ulu, ma ua i ai foi ma le isi suesuega, e le gata i le ulu, a o le fai. E mafai ona maua ai le falaoamata lea e tau o le gluten free flour. O le falaoamata lea e ese foi ona o lona tulaga i le soifua maloloina, o le kamupani mai atunuu mamao o lo o latou moomia ma ua faapea foi ona i ai feutanaiga ma le tatou Matagaluega i le fia maua.

O le vaega la ua oo i ai lenei faamoemoe, ua le o toe mamao ae amata. Ua mafai ona faatino a tatou suesuega sa faia e tatou fanau a Samoa i totonu o le tatou SROS, ae o se tulaga foi lele aupito sili ona moomia. O le a le mea sili po o le vaai o tatou tagata o mea sa galulue ma tigaina ai a tatou fanau sa auina atu i fafo e aoga, ona foi mai lea ua faatino ma maua lo latou malamalama ua maua le mea e tatau ona fai, o lea la ua tatau ona faatino, ae o le a vaai foi i fua o galuega. E moni ua fua mai galuega i le i ai o le design ma le oloa ua uma ona saunia, ae le o mafai ona vaai i le oloa ua uma ma

maea ona fai ma faatau atu. O le agaga lea na faavae ai se manatu i le faatuina o le tatou fale lenei.

O le faamoemoe foi o le tatou Matagaluega, afai lava e alu alu auga o le faamoemoe lenei ae te i ane ua faapea ua i ai ni tagata e fia faatau le kamupani lenei, ia, e i ai le avanoa ae i ai foi aiaiga e tatau ona uia e pei ona masani ai le faamatuina o mea faapenei a le tatou Malo, ona e i ai a tatou faiga faavae e tatau ona uia. A oo la i lenei taimi, ona faapena lea ona fai. Ae i ai le manatu i le aoga o lenei faamoemoe o le a maua ai e le gata o le oloa e mafai ona faapoopo i a tatou oloa e auina atu i fafo, a o le mafai e pei o le talo i le taimi lenei i le tele o le talo. Talu ai ona o le Koviti, o lea e pei ua faatuatuai ai le faiga o le galuega lenei. Aua foi e tele mea e auina mai fafo ua le mafai ai e le tatou kamupani ona faavavevave le sauniga ma le faatinoina o le faamoemoe lea. O lenei la ua i ai, ae ave a tatou oloa i fafo, maua ai galuega a le tatou atunuu, maua ai so o se vaegatupe e aoga i le faatupeina o faamoemoe a le tatou Malo aua le tautuina ma le atinaeina o samoa ma ona tagata nei ma a taeao. O se vaega lelei lenei e avatu ai foi le agaga faafetai i a tatou fanau o lo o faapea ona galulue. E tele lava isi mea o lo o faatino, e oo foi i le Koviti. Ua i ai foi masini i le tatou fale suesue ina ne i mea ane ua moomia se fesoasoani pe toatele foi ni tagata e aafia, a o la e i ai le mea e toomaga i ai le tatou atunuu. E le gata i lea, e pei ona silafia e le tatou atunuu sa i ai se taimi e le i mamao atu na logo mai ai ua aafia le tatou lalolagi i le faamai o le African Swine Fever e maua ai meaituaolo. O lea foi la o le masini lava lea e tasi e mafai ona faaoga e suesue ai a tatou meaituaolo pe i ai se mea o aafia. E le gata i lea, o oloa e gaosia mai i meaituaolo mai atunuu mamao, e mafai ona suesueina ina ia mautinoa lo latou saogalemu aua le fofoga taumafa o le tatou atunuu. O le faatinoina o lea galuega o lo o faapea ona lelei.

O le tele foi o isi vaega o le tatou faamoemoe i uta i le SROS e pei ona tau atu e i ai foi le faauilavea i se taimi ua tuanai o ou talanoa atu i le mea o le solar power. O le solar power e pei ona i ai, e moomia se maa, se battery e mafai ai ona store pe taofia le eletise e mafai ona faasoaso mulimuli. E pei foi o le mea lea ua i ai le taumafaiga o le faamoemoe o le tatou Matagaluega o le Malosi Faaeletise, o lenei foi ua mafai ona faaoga ai batteries mai fafo. O le faalavelave o batteries ia e oona, a oo i le taimi e uma ai lona olaga, e tatau lava ona toe ave i le mea na aumai ai, ona e fai si ogaoga o aafiaga. Ae ua galulue foi le Matagaluega lenei, ua latou faia se design o se battery, o se maa e faaoga ai i le tausia o le totoga, e le faaogaina ai mea e pei ona faaoga e isi maa ia ua maua e isi vaega o le lalolagi e oona. A o le maa lea, e mafai lava ona lafoai pe a oo i le taimi ua uma lona aoga. Ae o lo o galulue faatasi ai le Pulega ma le aufaigaluega ma le fanau a le tatou atunuu. Ia o se mea aupito sili lea ona faagaetia ai le loto. Tailo, ae ia te au lava ia o le Minisita o le Matagaluega, e ese lou fiafia. E leaga ua oo mai. O ituaiga atamai nei, e faapea tatou na o papalagi ma i latou e aumai i mamao ma

atunuu malolosi e mafai ona faatinoina. Peitai lau Afioga i le Fofoga Fetalai, o lea ua vaavaai atu ma tilotilo atu, e ono taunuu lea taunuuga i se tulaga lelei. Toe tasi lava se mataupu ona sa i ai se tasi o uso na saunoa i le tulaga o le fai. O le fai pei ona i ai le fai Isaraelu, e...

**SUI FOFOGA FETALAI:** Malie le Minisita se i tuu atu le avanoa i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, a o le i see ese le Minisita ma le tatou Fale Suesue, e lelei ona toe faamanino atili le afuaga o le faatuina o le Fale Suesue lenei. O atunuu uma lava e faalagolago lo latou tamaoaiga i oloa tau faatoaga, e tele lava le lamatia, aemaise lava le faatulagaga o tau o oloa e pulea e maketi i fafo.

Ma le vaega lua e sili atu ona lamatia ai se atunuu, o le malosi tele o mea nei o Tulafono e taofia oloa e faaulufale atu ona o faamai, ma e tatou malamalama tele ai, ona o le fai sa ola taolaola i Samoa, ae na oo mai loa le faamai, lea la ua tatou lavevea ai, afaina tatou fai. A o le taimi na ola ai fai e le i aafia i ni faamai, e matua maoae lava le mea na oo i ai, e tele lava, e le gata i le tetele o aufai, a o le tele o fai nei e fua matua ae le i pau le lagoele. O le tulaga lena sa i ai tatou fai faasolo mai lava i le 1950 seia taunuu mai i le 1960. O le faatumutumuga lea na oo i ai a tatou pusafai i le miliona pusafai na ave i Niu Sila. O le mea foi lea na oti atoa ai ma le tatou mea lea o le popo, ona o le manu ainiu. O le manu ainiu, e le i i ai se manu ainiu i Samoa, ae na oo mai foi i Samoa ona o oloa na aumai fafo ae le i lelei le vaaiga i na ona po. O atunuu uma lava la, e malolosi tele lava latou Tulafono e taofi ai le faaulufale atu o oloa i le tulaga muamua, tulaga mata, primary products po o le primary produce, primary exports, i le tulaga mata po o le tulaga muamua. O le ala lea na tatou o ai e fai le mea lea, ona o atunuu uma lava e taumafai e faataatia se fofu tumau, o le mea lea e alo i ai, o le fausia loa o ni a latou fale suesue, ina ia taumafai ona saienitisi e liliu oloa mai le tulaga muamua i le tulaga lua. O lona uiga, e le toe avea le talo i fafo, a o lea o le a ave le uisiki, fai mai le talo. O lea la e taua ai le fuafuaga lea na faataoto mai e le tatou Malo i le tausaga e 2006, le fuafuaga lea ina ia tatou agai loa e fai le tatou fale suesue. O lea la ua oo tatou i oloa ia tai pei o falaoamata, falaoamata mai le ulu, cooking oil mai le avoka, uisiki mai le talo. O lea la ua uma ona saunoa le Minisita i le auala lea ua tatou agai atu ai e siitia le tulaga o le tatou uisiki, e tai pei foi la o le nuu lea o Jamaica. O Jamaica, e lauiloa Jamaica i le latou rum, Jamaican rum.

O le tulaga la lea o lea e taumafai ai le tatou Malo ma agai loa e fausia loa se tatou lava kamupani ona e i ai lava le agaga musua foi lea i tatou kamupani ia e i ai nei e latou te gaosia le uisiki i se tulaga foi lea e mafai ai ona faatao i se production volume tele i fafo. Ma o le itu la lena lau Afioga, o lea la ua

tatou faalogo, o le uisiki lea e mafai ona faaaoga i ai talo. Pe 10 talo e aoga. O lona uiga o lea ua faataoto e tatou i se lumanai tele mo tatou faifaatoaga i le lumanai, e le toe tigaina ai e ave ni talo i fafo, a o lea ua mafai e tatou ona gaosi le uisiki mai le talo. O lea foi ua mafai ona tatou faaaogaina isi foi tatou laau e pei o le niu, e pei o le koko, e mafai ona gaosi uma ai fagu malosi ia. A o lea la ua tauave e tatou le talo ua filifilia e tatou saienitisi ona e sili atu i le latou vaai.

Lau Afioga i le Fofoga Fetalai, o le uiga maotua lena lea la sa agai i ai tatou e faatu le fale suesue lea e tua i ai le tatou atunuu ma mafai ai ona gaosi ituaiga oloa eseese ia i le tulaga numera 2 ma mafai ai ona tatou alofia le malolosi o tulafono ia e taofi ai oloa e avatu i atunuu nei pei o tatou. E pei foi o mea o fualaauaina. Ua leva ona fia ave tatou fualaau i fafo, e taofi mai ona o lea e maua ai le mea o le lagotui i totonu, e tai pei o mago. O le ala lena e le faigofie ai ona ave nei mea i fafo. A o lea ua taoto fuafuaga e mafai ai lava ona gaosi i Samoa nei oloa ia, o le uiga maotua taua lena, lea na mafua ai ona fai le faaiuga lena i le 2006. Ma o lea o lo o agaigai malie atu pea tatou e gaosi tatou oloa ia mai oloa e mafai ona maua i Samoa nei.

O le toe faaopoopo atu lena lau Afioga ona e i ai le faavae i tua atu na ala ai ona fausia ma faatuina le SROS i Samoa nei mo le atinae o oloa ia i le agai atu i le lumanai.

**SUIFOFOGA FETALAI:** Malo faafetai i lau Afioga i le Taitai o le Malo, o lea ua tatala ai nisi o fuafuaga alualumamao o le Malo aua le manuia o si o tatou atunuu.

Ou te tapa lau Afioga i le Minisita mo Faatoaga ma Faigafaiva e faaauau lau saunoaga.

**Tofa Hon LOPAOO NATANIELU MUA:** Faafetai tele. Ia, o le tulaga la lena i le tatou taumafaiga i le tatou fale suesue i se mafuaaga manaia. E pei foi lava a ou mafaufau i ai pei foi o le faiga o le Iunivesite. Ia, ae o lea ua tatou vaai i le tino mai o lena faamoemoe faapea foi lena faamoemoe o le tatou fale suesue. O le agaga ma le tatalo i le Atua e foai pea i le tatou Malo ma tatou tagata le malosi ma le poto e aumai e faapea ona faatautaia ai faamoemoega faapenei, e le faigofie, e le faigofie. Ae faafetai i le Malo i le fesoasoani, e faatupu mea lelei aua e tua i ai a tatou fanau, e tua i ai latou e le i fananau mai, faatasi ai ma tatou nei ua tatou faatinoina, ma fanau o la e faatoa fananau mai. Ia, o le tulaga lena o i ai lena faamoemoe, ma o lo o lelei foi ma matagofie le faatinoina ma le faatautaig o le tatou fale suesue, e o gatasi lava le futia ma le umele i faiga faavae a le tatou Malo e fua faatautu i ai. Ae le mafai ona galo ia te au ona ou faafetai i le Afioga i le Minisita o Tupe ma le tatou Malo i le taumafaiga o le mea lena, aua e \$2,500,000 e le o se tamai tupe. O lea la ua ou fai atu i ai i le Okika, ia e matua vaai lava i ai i mea ia ia avatu i le tatou lipoti i le faataunuina o le faaaogaina o le tupe

lenei, o la e clean bill of health. E leai se mea o faaletonu. E le faapea o ou fai atu a mea o i ai ni mea o faaletonu. E leai, o le tuu atuga lava o le faamanatu i le fanau a le atunuu ina ia faapena ona mataala.

Lau Afioga i le Fofoga Fetalai, o le tulaga i le mea o i ai le fai, ona o lea sa fesiligia ma o lo o faamanatu mai pea ma faamanatu mai pea e le uso a sui usufono na laga le mataupu lea. E tasi lava le togafai o lo o lelei ona faatautaia, o le togafai lea i Tanumapua a le Afioga ia Taimalie Charlie Ah Liki. E 40 eka o lo o totoina ai le fai Isaraelu. E 50 afe kilo po o le 50 tane i le masina o lo o mafai ona maua mai i le togafai lenei, faatau mata ma faatau pula. Aisea le mea e mafai ai ona fai? E \$800,000 i le tausaga o lo o faapea ona faaalu i le taumafaiga ina ia mafai ona tausia lelei le fai i aiaiga ma tulafono e pei ona tuuina mai i le taimi na amata mai ai le faamoemoe lea. O le ala foi lena ou te lagona ua faigata ai i nisi o el tatou aufaifaatoaga ona e le taugofie. A o lo o lelei faatautaia le togafai lenei. Ma o le manatu foi lena sa ia i matou ma le Matagaluega i le taimi sa matou feutagai ai ma i latou sa faapea ona lolofi mai i le fai lenei. E i ai foi le taimi na atagia ai i luga o faasalalauga le faitioina o au nei, ae o le mafuaaga lena. o lea la, ua latou toe malamalama i le mea na ala ai ona ou fai atu, e le taugofie. O lo o lelei faagasolo e pei ona ou fai atu le togafai lea, ma o lo o faaauau pea. O le fai e pei ona i ai le faamoemoe o le Matagaluega, fai Samoa, fai palagi Samoa lea sa maua i Samoa i aso ia, o lena ua toe faagaoioi, ma e i ai se taimi po o Oketopa, Novema i le tausaga nei, ona faapena lea ona toe faamatuu atu le fai lena i o tatou tagata e faapea ona totoina ma avatu foi i ai ma aiaiga ma tulaga e tatau ona fai. Ae o lo o ua tuu pea le fai Isaraelu ia te ia, lē o lo o mafai ona faatautaia ma fai ma tausia le fai. O le tele ia o le faamoemoe o le Matagaluega i le industry lea sa faapea e develop faalelei. Ae o le ala foi lena o le toe fafagu ona o maketi e pei o Niu Sila, na o Samoa ma atunuu o le Pasefika e ai talo, a o le maketi atoa i Niu Sila ma Ausetalia ma atunuu ia e i ai papalagi ma so o se atunuu, e ai fai uma lava tagata uma aemaise lava le fai pula. E pei o le ala lena e manaomia ai le toe fafagu o le tatou fai, ma e le o mafai ona aveesea e le Matagaluega o Faatoaga ma le tatou Fale Suesue le galuega o lo o faia nei aua le faaolaina o le tatou banana industry.

Lau Afioga i le Fofoga Fetalai, sa faaalua e se tasi o le Maota lenei se fautuaga manaia, se fautuaga pito sili ona lelei. Fai mai le fautuaga, toaga e fautua, ae vaai outou, o isi taimi tou te fautua fautua tou afaina ai i le fautua. Ioe. Ia ae mataulia la, o le Pulega lenei o le Kapeneta ma Ofisa Sili o Pulega o Matagaluega lea e afifio mai pei sa faatutu i ai le fautuaga. Ou te fai atu o le fautuaga a faapea this is one of the best advice, top advice I've ever heard from anybody, manaia tele. Toaga e fautua. Leaga o i e i ai faiga faavae a le Malo lea e ala ai ona ou tali, leaga o au o le sui o le Kapeneta. Ioe. Toaga e fautua. E i ai foi isi taimi e fautua soo ua e afaina ai. Ia pei e malu ae ivia le fautuaga, malu ae ivia. Ia, a o lau la fautuaga i le uso lea, le sui faipule o lea

ma te... ou te le tau atua le suafa. Tago oe e fai lau fautuaga lena i le tou vaega. E leaga o le upu mai le Tusi Paia, aua e te taumafai e aveese muamua le fasilaau i le mata o le isi tagata, a o la e tele le ogalaau na e i totonu o lou fofoga. Ioe, o le fautuaga lena e avatu. E ala ona ou fai atu e fai le fautuaga lena.

E manatua foi o au faatoa ou sui mai i le Matagaluega lenei e avea au ma Minisita, i le aso 31 Aokuso 2017. Leaga o faiga ma aiaiga faavae a lo tatou Malo, o lea ou te tautala i ai. Ina ua ou taunuu mai, faatauto au. Sa ou taua i le aso muamua lava i le taimi na interview ai au. O le a lau mea o le a e alu e fai, ou fai atu i ai, ou te alu muamua se i ou fesili, pe faafefea ona fai lea galuega o le Minisita. Na ou fesili, aumai lea o le faamaumauga, alu atu le CEO po le Ofisa sili o Pulega a le Matagaluega, aumai ia te au le manual. Ona ou faitau ai lea i le manual i le po atoa. E ui lava la ou te le i maua uma mea e tatau ona fai. Ae ua i ai se idea, ua i ai si na malamalamaaga, aua o au ou te le i faigaluega muamua i le Public Sector. I was in the Private Sector all my life. I lou vaiaso lona 3, ae vili atu le isi tagata ia te au, fai mai, o le palagi, ou te le iloa po o se palagi po o le a se atunuu. E manaomia ou te fia feiloai, ou fai atu lea, o le a le mea e te fia feiloai mai ai. Ou te fia feiloai atu, e manaomia se tusi, e fesoasoani i le faiga o vaa fagota e 30 miliona. E leaga o lea ua uma ona saina le tatou feagaiga. O au nei pe i ua over the moon, ua ou te i faapea auoi tafefe, o le mea lelei lenei mea. Ou fai atu loa, se i faatali mai se i ou valaau atu. Ae toe valaau mai, ona ou valaau lea i le Ofisa Sili o Pulega le afioga ia Tilafono David Hunter. Sau, o le a fai ta vaa fagota manaomia le 30 miliona, e fai ai vaa fagota. E le i umi lava ae tu mai le CEO i ou luma, e tu mai e sela. Ou fai atu, se i liliu mai lava lou papatua ae te i ua fai mai. E i ai se mea o faaletonu lau Afioga i le Minisita. E leai o lea ou te fia iloa po o oe o le mea ua fai ni ou apaau. E faatoa ou valaau atu nei lava, a o lea ua e tu mai i. Ae fai mai, se lau Afioga e pei uma lava o le mataupu lea o lea na e valaau atu ai. Ia o lena la na fofola ai loa le fala i le Ofisa Sili o Pulega. Fai mai, o le MOU lea na saina i le va o le Malo ma le kamupani lea. Ae vaai lau Afioga, na saina la i lau Princessa, i le aso 15 Aokuso 2017. A o au lea na ou taunuu atu i le aso 31 Aokuso 2017. Na fofola mai lea o le fala ona ou fai atu lea, o le a la le uiga o nei mea? Ae fai mai e masalomia le MOU lea na saina ina ua alu ese le Afioga sa nofo ai i i aua o le aso 15 Aokuso, o au la ou te le iloa na mea, leaga ou te le iloa le aso. O lona 2, o le fautuaga na ave i le Matagaluega, aua le faia. E le i uia aiaiga faavae a le Malo o Samoa e manaomia ai. Ua ou fiu e sue le FK, ou fai atu, a o lea e fai mai le FK e tatau ona aumai le pepa ia oe, ave i le Kapeneta endorse e le Kapeneta aumai le pepa ia oe. Ae fai mai le CEO, lau Afioga e leai se mea na faia. Lau Afioga foi e le o le loia a le Matagaluega na faia, e le o le loia a le Attorney General na faia, a o le loia mai tua.

Ua outou vaai la i ai, ua outou vaai i le mea lea e fai. Tuuaia le tamaloa lea, fai mai e a. O le mea la lea e te manao ai e te sau i totonu e te manao e taitai

e te pule lava oe i le faiga o au faiga. O le kamupani lea e taua o le Juvenile Assets, sa fai le latou paaga ma le isi kamupani Samoa ua uma foi ona suesue, e igoa o le Malosi o le Nuu. O le Malosi o le Nuu, o le latou loia o le loia lea e sainia, ou te le taua igoa o i latou. A o le tagata lea le isi shareholder, o le tagata lea na tatou vaai i ai i le faaiuga o le faamasinoga, lea na aumai mai o, lea na fai mai le faaiuga, a mea o tagata ia o front men a tagata lea sa sainia le feagaiga.

Lau Afioga i le Fofoga Fetalai, e ala ona ou taua, leaga o lea na fai mai le fautuaga, e faatutu i tua i i, ae iu mai i luma i i, i le Kapeneta. O lea la e tatau ona ou tali atu ai i mea nei. O le isi mea, ua ou te i i le isi aso, ae sau le imeli, i le imeli a le [minister@maf.gov.ws](mailto:minister@maf.gov.ws), e tatau ona ou tatala leaga o le imeli o le property a le Malo, so ne i te i la ua faapea. E leai sau feau e ala ai fua ona ou tago i ai, especially o au o le Minisita o Faatoaga. Ae sau, o le carbon credit, e manaomia la le tatou feagaiga e 60,000 eka AU\$350 miliona 2% le commission, AU\$7 miliona. Ua outou silasila la i ai, auoi talofa e ia Samoa, pe a fai o le faiga lea. Let me borrow you own words, faafofoga oe Samoa, faafofoga Samoa, faafofoga mai la Samoa i mea ia. Na outou o foi i lou itumalo, outou polomisi i le 6300 eka tau o le Cornwall estate. E ala la ona ou fai atu ona o faiga faavae lea e talanoaina iinei o fanua.

Se i fai lava si na au tamai tala i le Komisi lea sa ou Taitaifono ai o Fanua ma Suafa. E tasi lenei faavae, o le mafuaaga na ala ai ona fai le matou fautuaga, o lea e afifio mai sui o le Komiti. E tasi lenei mafuaaga sa i totonu o lou loto, sa teu i lou loto. O le 6300 eka lea na faatau i se vaitaimi o le 1866. Na faatau e le tamaloa e igoa ia Aokuso, i le palagi e igoa ia Frank Cornwall. E alu atu lava i Asau e tau i Falelima. O outou iloa le tina o lou nuu i le mea lea ae tou o atu fai mai, a tou o mai, matou te faafoi le fanua. Tou te iloa le mea na ala ai, e tasi lenei mafuaaga na ala ai ona faavae le manatu lea faamaualuga le tulaga o le Lands & Tittles Court. O le faatulagaga lea na ou aumai o lea e silafia e le matou Komiti, na aumai le faatulagaga, le structure o le court. Faamasinoga o Apili, Faamasinoga Mauualuga, Faamasino Sili, Faamasinoga Faaitumalo, Family court ma isi Faamasinoga, vase faapea le laina, sau i lalo faapea, LTC. O le mea lene na ala ai ona matou inaina e fai le fautuaga, o la e i totonu o le matou lipoti. Lau Afioga i le Fofoga Fetalai, e le iloa e outou le tiga o le matou nuu, ae outou o atu toe faavevesi i a outou polomisi e le mafai ona fai. Tou te o la e faafoi fanua o Vaitele, tou te o e faafoi le 18,000 eka a Falealili? Tou te o e faafoi ia fanua o isi nuu ia ua ave e le Malo? Tou te o e ave fanua o Apia ma isi afioaga ia? Aua le faia le upu faaoleole, aua le faia tala faaoleole na, leaga e logo malie leaga o la e tiga tagata e manao i se faaupuga faapena, ae le mafai ona fai. E le mafai ona fai, aua tou te faalata le atunuu.

O lea ia te au uma le history o le faatauga o le fanua le la. Leaga ou te tagi lotulotu pe a ou vaai i ai. Na ou malaga i Niu Sila 1981, ou alu ou tilotilo i totonu o le Turn Paul library, ona ou vaai ai lea i le faiga. Ou alu i Siamani



ou alu toe tilotilo i ai i totonu o le latou archives. E oo ifo i le taimi na saina ai le Berlin Agreement i le va o Amerika, Peretania ma Siamani. E 1,630,000 le aofaiga o eka o Samoa ua faatau. A o le aofaiga o fanua o Samoa na aumai e le Atua, 683,000 eka. E ova i le 3 times na faatau ai e papalagi. O le mea lena, i lau tautoga na fai, ma le tautoga a le Komiti, e le toe tupu se mea faapena i Samoa. Ae tasi le auala e fai ai, faamalosi Faamasinoga o Fanua ma Suafa. Ia ave i ai le power, e mafai ai ona latou faia faaiuga lelei e puipuia ai eleele o Samoa. Lau Afioga i le Fofoga Fetalai leaga le mea e tiga, fai mai le tala a le isi ma nai i tagata o lou nuu. Lopao talofa ia oe, ua fasi lava le gata ae pupula, le tagata sa outou mafuta. Ou fai atu, ou te iloa outou e le malamalama tele i le mea lea o le gata. O le gata, o le mea foi lea e tau ai matou o le gata ula. E i le va o le 7 ma le 10 i le taeao, e alu ifo le tama taoto i totonu faataaliolio i luga o le ogalaau. A e vaai atu i ai ua lanu mumu, ua paauli, a oo la i le taimi foi lea ua vevela le toto o le tama, ona e vaai atu lea ua uliuli. Ae faaeteete la pe a uliuli le tama, faaeteete pe a uliuli. O le ala lena lou nuu, toa le tai, o lau tala na fai atu ia outou, i le taimi faatoa amata le Paeaiga lenei, tatalo i le Atua. O le fautuaga foi lena a le Taitai o le Malo na fai mai ia te au, tatalo i le Atua, tatou sue i le Atua. Lau Afioga i le Fofoga Fetalai, o le a ou faapea atu, faamasino oe Samoa.

**SUI FOFOGA FETALAI:** Ia malie lau Afioga i le Minisita o Faatoaga ma Faiga Faiva, se i tulai mai lava le Minisita o Fesootaiga, po o le a le mea lea e fia saunoa i ai.

**Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo):** Lau Afioga i le Fofoga Fetalai, e fia faafesili atu lava i le Afioga i le Minisita, ona o lea e le o malamalama le Maota nei, a alualu lana faa-Samoa, tau lana upu palagi e tasi. O le upu lea fai mai o le Predecessor. O lea la e le malamalama matou, leaga o lea e fai ma tusi mai le aao o le Minisita i le pito lea, e pei e foliga e tusi ia Olo. Po o se tasi lea, po le faapapalagi lea o le suafa o Olo po o le a lea upu. O lea e fia fesili atu i le Minisita, e pei e agai lava lana lauga, mataupu uma ia e 3 sa lauga ai, e agai lava i le upu lea Predecessor ea, po o le a le upu. O lea e faafesili atu ai i le Afioga i le Minisita, po o le a tonu le uiga o lea upu. Faafetai.

**SUI FOFOGA FETALAI:** O le a tuu pea le avanoa i lau Afioga i le Minisita e te faa-Samoa ina le upu lea, ma faasolo ai le lauga matagofie. Lau Afioga i le Minisita o Faatoaga ma Faiga Faiva.

**Tofa Hon LOPAOO NATANIELU MUA:** O oe le isi tagata a e vaai i lau masiofo, tailo foi i le lalelei o se isi lava Predecessor o i ai i le lalolagi lenei, pe tutusa ma lau masiofo. Ioe, faaigoa ai...

Lau afioga i le Fofoga Fetalai, o le a ou oo i lou itumalo.

**SUI FOFOGA FETALAI:** Ia faafetai, malo le tofa loloto i lau Afioga...

**Susuga Hon Laauli Polataivao Leuatea:** Lau Afioga i le Fofoga Fetalai, pe maua lava se avanoa faamolemole.

**Tofa LOPAOO NATANIELU MUA:** Lau Afioga, e le i ai se vaega...

**SUI FOFOGA FETALAI:** Malie le Minisita se i ou fesili muamua, i le sui usufono mo Gagaifomauga Nu 3. E i ai se mea o e fia saunoa ai ua afua ai ona e tulai.

**Susuga Hon Laauli Polataivao Leuatea:** Ioe faamolemole lau Afioga, sa ou le i manao lava e faalavelave le saunoaga matagofie. Sa tuu lava se i afu. Ae o mataupu e lua ia e agai mai ai le Minisita, o mataupu e aafia ai au, lea sa ou saofai i le nofoa o le Minisita o Faatoaga i le taimi lea. Malie lau Afioga, aumai se avanoa, leaga o lea e faafogafoga le atunuu, ma lalafu mai, ia faamasino oe Samoa. Aumai la se avanoa se i ou faamaninoina mataupu ia e 2, ona manino ai lea o le mata o le vai. O lau talosaga lena. Lau Afioga e leai se isi na Minisita i le Ofisa o Faatoaga muamua o au. O lea na ou faamavae ae ou alu e tali lau faamasinoga. O lea la ua aumai nei mataupu e 2, ma maioio mai ai ma fai mai sao, o au mea la ia e te sau i i, e fai i i pe a e tulai mai. Lau Afioga o le tatalo lena, aumai sou avanoa se i faamalamalama le mea lea, e sau ai le faaoloataua. Ua matua sese i Sini, sese sese i Sini.

**SUI FOFOGA FETALAI:** Ua ou manatu, ona e le i taua lava lou suafa, e tusa o tatou Tulafono tumau. O le saunoaga a le Afioga i le Minisita, o le saunoaga faalauaitete, ma e le o taua lava le mamalu o se sui usufono i totonu o le Palemene lena. O le mea la lena e tau faafaigata ai ona tuu atu se avanoa, ona e le o taua lava lou suafa. O le mea la lea, malie le sui usufono, e le faatagaina le avanoa, tuu pea le avanoa e faaafu ai le saunoaga. Lau Afioga o Minisita o Faatoaga, tulai mai e faaauau le saunoaga.

**Susuga Hon Laauli Polataivao Leuatea:** Nafaitoa, e le o se soli Fono lou tulai atu, malie lou finagalo. A fai o lou finagalo lea e leai sou avanoa ua lava lea. Ae i ai le taimi ou te faamaninoina ai mataupu lena, i le isi auala e maua ai sou avanoa. A o lea ua e tapu mai, ua tuufau le privilege o le Minisita e saunoa ai e fai upu ia te au. Ae le afaina, ua lava lea, fai lau pule, fai lau pule, Nafaitoa o le a ou pule i lou loto, ae fai lou avanoa e faamanino ai mataupu ia e tuga tuuaiga ia.

**SUI FOFOGA FETALAI:** Lau Afioga i le sui usufono mo Gagaifomauga Nu 3, faafetai i le tofa loloto. O lea ua pulea lava e lau Afioga lou finagalo e tusa ma le vaivai o le Nofoa.

**Susuga Hon Papaliitele Niko Lee Hang:** Lau Afioga o le Predecessor o le tagata na muamua atu ia te ia, o lona uiga o au. o lea sa fesili ai Afamasaga. O le uiga lena o le upu lea na tau. A o lea ua tau mai o le Predecessor e ese, se faamolemole faamanino upu.

**SUI FOFOGA FETALAI:** O lea lava e aumai lava e le Minisita le faauigaina o lana saunoaga. E le mafai ona faauiga fua e le isi sui usufono. Se malie ia, o lea lava e tausi lava i le vaatele lo tatou nonofo ai i le Maota. O le mea lea tapuai. O lena ua e saunoa, e i ai ou avanoa, ia o lena. Lau Afioga i le Minisita ua e oo i lou itumalo, o lea ua ifo mai foi i totonu lou sa.

**SUI FOFOGA FETALAI:** Se i malie lava le sui usufono o Falealii se i address muamua le mea lea e te tulai mai ai.

**Afioga Fuimaono Teo Samuelu Teo:** O le mea e fia faamalamalama i le saunoaga a le Minisita. Ona o lea e faafofoga le atunuu, ou te iloa foi e i ai taimi tatou te faalogoina ai le aave o le savali i fafo i nisi auala. O le ala lea e popole ai lou lagona na o au, a o totonu o le Palemene, e manaia. A matou faalogologo atu i le mea lea, e le se tamai mea, mea ia e talanoa i ai le Minisita. A o le manaia ai ae faamanino, ina ia mafai ona faafofoga foi le atunuu, i le pitolaau a le Predecessor, ina ia faamasino mai ai Samoa. Aua e le gata i le fai i totonu i i, ae tatou faalogologo la i nisi auala o fesootaiga, ona oo mai lea ia tatou, e tataua ona fesili i totonu i i mea a le atunuu, e manino ai mea uma. O lau tuualalo, ia ae faafetai o lea....si mea lena o lea na tau fia faamalamalama. E fia malamalama atu i ia vaega.

**SUI FOFOGA FETALAI:** Faamolemole le Minisita, se i tuu mai la se avanoa i le Nofoa. E avatu ai la se tala i le mea lea.  
Le sui usufono o Salega.

**Tofa Olo Fiti Afoa Vaai (Salega Sasae):** Ona o lea na taua lou igoa, ua te i lava ua tau fua lou igoa, ona o lea sa talanoa i le Predecessor. Ou te iloa po o e malamalama ai foi lau Afioga. O le sa i ai i le Ofisa ae le i, before o le Minisita, o lea la e sao le mea lea e tulai atu ai le Laaulialemalietoa, o ia sa Minisita, ona sosoo mai lea ma le Minisita o i ai nei. O lea e tau faamalamalama atu ai le mataupu. Ae sa leai se matou tala, ona o lea sa ou faalogologo atu, ua oo le Minisita po o le Minisita o Elelee, ae manaia lava le saunoaga a le Minisita. O lea foi sa saunoa manino le Palemia, e le aumaia ni mea i tua i totonu o le Maota, ae o lea lava e fai lava le mea lea, o le lau

mai o le tulaga i le faalauiloa a le Vaega Faaupufai a le FAST. Malie ia lau Afioga, se aumai se faatonuga e taofi ai ia mea. Ma le faaaloalo.

**SUI FOFOGA FETALAI:** Ua ou tuua le avanoa i le sui usufono mamalu faatoa faamaui nei lona finagalo, ona o lea sa taua le suafa. O le ala lea o le tuu atu o le avanoa. Malo saunoa, ae o lea ua foliga mai e ese foi le mea lea e te agai i ai. Ae lelei ona ou faamaninoa le mea lea na saunoa i ai le sui o Falealili. O le tatou Tulafono Tumau 183 - Afai e i ai ni tuuaiga i le tulaga o le aumaiga o a outou saunoaga, e tatau ona faailoa i se tulaga o le faatuina o le lafo ma sauni e aumai faamaoniga. O le Tulafono Tumau lena. O le mea lea o le saunoa i tulaga faalauaitete, ae a oo loa i ni tulaga e tatau ona i ai ni faamaoniga e tuuaia se sui usufono o le Maota lenei, e tatau lava ona faatu le lafo, ma sauni e aumai faamaoniaga mo le Maota lenei. Ina ia mafai ai e le Nofoa, ona poloaiga ina ia aumai se faamaoniga o mea ia. O le mea lea o lea e fia faailoa atu i le mamalu o le tatou Palemene i lenei afiafi. O le tatou Tulafono Tumau lena, a oo loa ina oooo i ooooga o lona uiga e tatau ona tapa faamaoniaga e tauala i se lafo faatu, ma faaluaina, ona faataatia loa lea i luga o le Laulau-a-Fono. E pei o le agaga lena, e ao ia te au ona faamanino atu mea ia, e pei ona taumafai mai ai, le sui usufono mo Falealili. Ae peitai, o lea e i ai le talitonuga o le Nofoa e i ai le taimi o le mea lea. O lea e taea i lau saunoaga, o lea foi la ua aumai le saunoaga a nisi o sui usufono mamalu, e i ai le taimi. A o lea ua e saunoa, o lea ua e saunoa o le a e oo i lou itumalo, o le ala lea o le fai atu o le Nofoa, faasee loa i lou itumalo, i le tulaga e pei ona e saunoa i ai. E pei o le tali atu lea.

**Afioga Fuimaono Teo Samuelu Teo:** E leai e le paoina le tofa i lau Afioga, e tasi lava le vaega sa fia manino i ai, o le vaega lea, ona o lea ua taua le upu faa-Peretania lea, o se mea e fia faamalamalama. O lea foi na saunoa i ai le Minisita e fia manino i ai i le vaega lea. O lau lena tuualalo, ua taumamao tele i tua le mea lea ua oo i ai lau Afioga, a o sina mea e fia faamalamalama, lea na ala ai ona tau avatu le tuualalo, e manaia, faasao le uamea la e vevela, e vave ai ona sao. Ae a tuu i se isi taimi, ona ese lea o meafaigaluega e faaoga e faasao ai. Ma le agaga faaaloalo.

**SUI FOFOGA FETALAI:** Malie le sui usufono o Falealili, pei e foliga mai ua e faataumatatao i le Nofoa. Ae e le o le tulaga lena e faafoe ai Taualumaga o le Fonotaga lenei. O le mea lea, o le a le faaiuga ua avatu e le Nofoa, malie...A tautala le Fofoga Fetalai, alaala i lalo.

**Afioga Fuimaono Teo Samuelu Teo:** Ia faafetai lava, o lea o le a ou nofo i lalo.

**SUI FOFOGA FETALAI:** Sa ou tautala foi i le taeo analeila, ou te le fia faaluaina o le fai pea o le faasoesa i le Nofoa pe a fai ua fai sana faaiuga. O se uiga le migao lea. Ae ou te le manao e toe oo i ai se tala a le Nofoa. Malie le sui usufono, o lea ua ou fai atua le faamatalaga, faasee le saunoaga a le Minisita i lona itumalo.

O lea foi ua toe tulai mai lau Afioga i le Minisita. A o lea ua fai lau faaiuga, finagalo malie ia lau Afioga.

**Afioga Hon Afamasaga Lepui ai Rico Tupai:** Finagalo malie lau Afioga, o le tulaga lea sa ou fia malamalama ai, o lea la e pei ua maua solo mai le faauigaina o le upu. Ae le i saunoa mai ai le Afioga i le Minisita. Ua ou tulai atu i le ava ma le faaaloalo, ona o le tulaga lea e te saunoa ai, i le Tulafono Tumau o le tatou Maota i mea faapenei. Ae ona o lea ua malele le afioga i le Minisita, ma o lea ua ou faalogologo atu, o lea ua faauiga mai le upu. O lea la e saunoa le Minisita i le Minisita sa muamua atu i ona luma. Ma nei mau lisi na lau mai o nei mau mea, a o lea la ua e saunoa, o tulaga aloaia o mea faapenei lau Afioga. E faatu atu le lafo, ina ia momoli mai luma o le Palemene...

**SUI FOFOGA FETALAI:** Malie le sui usufono mamalu, ua uma ona fai lau faaiuga i le mataupu leni. Malie lau Afioga i le Minisita. Se i utagia se vaivai o le Nofoa.

E pei ona ou fai atu, malie le mamalu o le Palemene, o lea lava ua matau lava i le agiga o le matagi ma saunoaga faalauaitele, ma faamanino ma le faamalamalama a le Afioga i le Minisita, a o lo o taoto lava...o le ala lea o lou le tapatapa i nisi lava tulaga, ona e manaomia ia faamaoniga, pe a oo i ona ooooga. A o lea ua saunoa le Minisita, e faapena, ua faasee ese ae o lea o le a agai mai e saunoa i lona itumalo. O le mea lea lau Afioga i le Minisita saunoa.

**Tofa Hon LOPAOO NATANIELU MUA:** Lau Afioga i le Fofoga Fetalai, e faalogo lava i lau Afioga, e leai foi se isi e faaituau atu i lau Afioga, e leai o le mea e te saunoa ai, o le mea lena e fai. Ae augofie lou sui usufono, e soo se mea. Ae ui i lea, o lau faaiuga e taua faafetai.

Lou itumalo o Vaisigano Nu 1, Vaisala i Asau. Ou te manatu o lea ua tufale tulima le lupe sa talisoa i le atu folasa o tupu. Ina ua filifili foe muli o le tautai, sa tootaumua ua mafua ai ona faatau silimea le siliga, ina ua utusagisagi le lupe lele malie, aua o lea ua faaifo i le malae o le totoa. Si ou nuu e o Vaisala, le afio o Tapaau ma le Gafa, faapea foi le afio o le Aloalii lau Afioga Vaai aemaise le mamalu ia Taulauniu ma Sa Oloapu.

Si ou nuu i Auala, le afio o Lealiifano ma Tapu ma le Toalima ma upu ia te oe Safune.

Le nuu e pele i lou loto le nuu o Asau. O oe na e filifilia au ou te sau i le Maota. I le tatou osigafeagaiga ina ua ou malo i le palota, na ou fai atu, ou te moulu, ou te totolo i lou manava, ou te ae, ou te tamoe, ou te ai palapala aua le tautuaina o le paia o le itumalo, aemaise le afio o Aiga, susu o Tufuga ma le Aiga Sa Tufuga, afio mai le Matua ia Masoe ma le Aiga Sa Masoe, afifio o le Falefa o Usoalii ma le latou maopu, ae tainane lo tatou saofaiga i le paia ia Salafai Faiga i le faaitualalua o le Falefia ma le Siuofanua faapea le fofoga o Fao ma Mua.

E le gata i lea lou itumalo, i le tapuaiga mamalu a ao o faalupega i so o se fatafaitaulaga i so o se Ekalesia i totonu o lou itumalo.

Le paia e i faletua ma tausi, saoa ma le malosi o le nuu e oo lava i a tatou fanau, faafetai. O la outou pule lea.

E faapitoaugafa sina au faamatalaga lava e faafetai ai i le Susuga i le faafeagaiga i le matou Matagaluega i Falelauniu i le matou Tausi Matagaluega faapea foi le tama malolo manumalo ia Aisoli, Faaaliga ma le faletua, faapea foi le susu o le susuga i le fofoga o le Sinoti o Salafai i Sisifo le Susuga ia Reupena Asiata ma le faletua ia Malae ma le nofo a alo. Faafetai tele lava. Faafetai i a outou tatalo lou itumalo e ma le aufaigaluega a le Atua. Afai o le a le au lou pale pe le faamalieina lou... ona pau lava o se tautua ua mafai e lo outou sui usufono.

Lou aiga, malo. Le tina ia Lafitaga, aiga i inei ma aiga i fafo o lo o faapea ona lagolago mai faapea foi sui o le matou nuu ma le afioaga o lo o aumau i atunuu mamao, e mafanafana le loto i la outou lagolago. Ua uma ona faatino nisi o galuega sa feagai ma le tatou Malo i auala o Vaisala faapea foi ona faia le auala i Auala ma le toe faia atoa o le paipa. Malo faafetai i lau Afioga i le Minisita o Galuega ia mo galuega ua uma ona fai. E le gata i lea, o le auala i Utuloa pei ona taua o le a faia i se taimi vave. Ae a le paipa lea na pau i lalo le tau? Faafetai tele lava i lau Afioga ma le Matagaluega e 30% lea na pau ai le tau o le paipa ona e mai le paipa. Faafetai tele lava mo le silasila i lau Afioga i le alofa i lou itumalo. Ae o nisi o galuega pei ona i ai, ua faafofoga le tatou itumalo, e le po se lilo o lena ua faalauiloa atu e le Malo, le Malo lenei galuega o le a faatino i le tatou ava, le tatou uafu, ia o se taimi foi ma le tatou malae vaalele. Aua tou te popole, e le o i ai lava se isi o maua le lisi, o la e i ai feutagaiga o lo o faia e i ai foi nai faafitauli tau technical problems la e i ai i le ownership o le fanua. O le ala lena. Ae aua le faapopolea le tofa ma le faautaga Aiga ma Salafai, fetagofi e lagolago le taumafaiga a le Malo o lo o faia i Masamasa aua o le mea lena e tupu pe a faapea ae alu ese le lagolago a le tatou afioaga i mea o lo o fai. O le Malo lenei, e le i avea tou elele, e le i avea e le HRPP, e le i avea e se isi lava talu mai ona tutoatasi Samoa. Fafetai ia Niu Sila na latou omai faatau e latou le fanua tuu aloaia mai ia Samoa mo le taimi lenei, tatou aeae ia lea manu ua ulu, tatalo i le Atua e aumaia e ia le tali o mea uma.

Lau Afioga Toleafoa Faafisi, ia, e ui lava o lea ou te iloa o lea e te faalogo mai ma e faafofoga mai i le tatou Fono, misi oe, manuia lou malolo manumalo mai le galuega ma sui usufono o le Palemene. Ia e faapena foi se manatu i lau Afioga Tuitama, all the best. I lau Afioga Faasootauloa o lena na e vili mai o lena e te faamaimai, inu le monavi e malosi ai. Faamanuia le Atua i ou faiva. E faapena foi i lau Afioga Mulipola Laki, aua e te popole, e toe oso foi le la.

Lau Matagaluega, afioga ia Tilafono David Hunter, Seuseu, leaga o lea e faalogo mai outou aiga ma outou itumalo po o a tou mea na fai. Malo le fai o le faiva, faapea le Pulega, le mamalu i le Matagaluega faapea foi le Fono Faatonu a le SROS, malo lava.

Le Komiti Faatonu, ia, toaga e fai o outou faiva o lena e lelei, taumafai ia fai nisi mea lelei mo Samoa.

Asosi a le aufaifaatoaga, asosi a le au tautai, le vaega o lo o lauina tatou oloa ma fua o tatou faatoaga i fafo, ia, e faapea foi le aufailafumanu, le au gaosi oloa, faafetai tele i lo outou sao mo Samoa. Faamanuia le Atua i o outou faiva ma outou tiute. Le Komiti Faufautua, Advisory Committee, ia, e i ai se taimi tatou toe feiloai i le masina fou, e fai ai tatou lululima ma tatou fusifusi ma faamanuia mai outou ia te au ae o lea foi ou te faamanuia atu ia te outou. Faafetai tele lava mo mea uma, faafetai i le Maota nei, faafetai i le Pulega. Ia, ua uma lau lauga, a tuuama le fua, folau i lagima le paia o le tatou Maota faapea le Pulega a le tatou Malo.

I latou o lo o faafofoga mai Samoa, ia manuia outou faiva. I le suafa o le Tama, le Alo ma le Agaga Paia. Amene.

*Na faaaliala le agaga fiafia o le Palemene i le patipati o latou aao i le maea ai o le saunoaga talifuaitau a le Minisita mo Faatoaga ma Faigafaiva.*

**SUI FOFOGA FETALAI:** Ua faamalo saunoa, malo malele i lau Afioga i le Minisita mo Faatoaga ma Faigafaiva, e faapea foi le Ofisa o Suesuega Faapitoa.

E i ai le manatu o le Nofoa o lea ua afulelea le tausaga i le toau o ufi i le saunoaga matagofie a lau Afioga i le Minisita, ua o se matagi foi e agimalie i le faafofoga a le Maota. O lea ua tu lafoga le manu na saili mafua ma ua e foa foi le papa nai pululauie e pei o le fetalaiga nai le Alataua. Ua faafofoga lou itumalo aemaise Samoa. O le mea lea e momoli atu ai le faafetai tele. O le upu moni ua tutupu matagi i liu o vaa e pei o le tala e fai i le vaa o Pualele i lenei afiafi i lau saunoaga. Malo tapena. O lea ua faafofoga lava lou itumalo ua oooo lava i tulaga uma, ia faafetai tele. Malo le tapena, malo le onosai, malo foi le fofolaga o le fala a o faafofoga le Maota ma Samoa. E i ai le taimi e manino ai auofala i mea uma na e saunoa i ai.

O le mea la lea, ia faamanuia le Atua. O lea foi ua momoli lau faafetai ma lau faamanuiaga i le paia o Matagaluega sa galulue faatasi i lenei 5 tausaga,

a lea ua tofua malie le atunuu i lo outou soifua tautua. Ia faamanuia le Atua i lenei afiafi. Malo mo mea uma.

Ona oo mai lea o le tatou faasologa, ou te tapa lau Afioga i le Minisita mo le Soifua Maloloina mo lau saunoaga.

**Tofa Hon FAIMALOTOA KIKA IEMAIMA STOWERS (Minisita mo le Soifua Maloloina):** Faafetai i lau Afioga i le Fofoga Fetalai mo lou nei avanoa. Lau Afioga i le Fofoga Fetalai, o le a mati'e pea ia i tiasa o tupu paia ma mamalu sausaugata o le aso aua o lele ua sooula le fala i ou sa ma ou faigata. E viligia ai matagi le moe i le faamoemoe ae lili'a i matautu le solo a le tamaitai, aua e ui lava ina matua i le oo le tetele o pesega i le Papaseea e pei o upu i Faleata, ae lili'a lava tino i maugafolau o laau tauluulu ma talaulau.

E auai faatasi i le viiga ma le faafetai aua ua faafofoga le lagi i le faapolo ma le faasagi sa molia e lau Afioga i le Fofoga Fetalai aua le faatagisia o faamanuiaga a le Atua mo le Fonousu a le Palemene aemaise o si o tatou atunuu pele o lo o taputapu mai. Lau Afioga i le Fofoga Fetalai, e faigata le faafofoga tapuai mai a Samoa i ona tulaga faalupea.

Ou te muai faatalofa atu ma ofo alofa atu ai i le faafogafoga tapuai mai a Lana Afioga i Le Ao Mamalu o le Malo, lau Afioga i le Tuiaana Tuimalealiifano Vaaletoa Sualauvi II ma lau Masiofo. E faapena foi ona faatalofa atu i lau Afioga i le Sui o le Fono a Sui Tofia, lau Afioga Le Mamea Tuiletufuga Ropati Mualia ma lou faletua.

E faatalofa atu foi i le tapuaiga mau i Aiga o Tupu, Aiga o Nofo, Aiga o Papa, Aiga na Tafaifa. O le paia lava lea aua Aiga ma latou Tama, o Tama foi ma Aiga, Pule ma Tumua, Ituau ma Alataua, Aiga i le Tai ma le Vaa o Fonoti.

E faatalofa atu foi i le faafogafoga tapuai mai a nai o tatou uso i le motu i Sasae, le paia lava lea aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, le Laau na Amotasi, le Faatui o le Motu ma Auvaa o Tootoo ma upu i le Manuatele.

E faapitoa le faatalofa lau Afioga i le Fofoga Fetalai i le tapuaiga a Taitai o Ekalesia i fatafaitaulaga e fia ma le afaigaluega totofi o le Talalelei o lo o nonomanu i le ao ma le po mo se manuia o Samoa. Faamalo le tapuai, malo le galulue, malo le faatoatoa, ua faafetai tatalo ua ae manuia ai faiva o le Palemene, a o tau faaiuu feau ma galuega sa fuafua ma faatino mo le Paeaiga XVI lenei o le Palemene o le Malo Tutoatasi o Samoa.

Lau Afioga i le Fofoga Fetalai, e ui lava foi i se tofa i le Maota aua le tau faaiuuuga o galuega a le Palemene i lenei Paeaiga, ae a na le ogatasi ma le finagalo o le Atua, o le foe lava e see i le ama. Ae faafetai i le Atua o lenei tatou te fesilafai i luma o le nuu ae le o tua o le nuu. Ua tatou fesilafia i vaelupemaua ae le o vaelupesaa i le pule faasoifua a lo tatou Matai Sili i le Lagi i lo outou soifua ma so matou ola.



E faatalofa atu i lau Afioga i le Fofoga Fetalai. E faatalofa atu foi i lau Afioga i le Taitai o le Maota, lau Afioga i le Palemia lau Susuga Tuilaepa Lupesoliai Dr. Sailele Malielegaoi. E faatalofa foi i le tatou Aiga Kapeneta faapea Minisita Lagolago.

E faatalofa atu foi i lau Afioga i le Faamasino Sili faapea lau Afioga i le Peresetene o le Faamasinoga o Fanua ma Suafa, tamaitai ma alii Faamasino faapea le Ofisa o Faamasinoga.

Taliu atu i lena Itu o le Maota, e faatalofa atu ma ofo alofa atu i a outou Afioga i Taitaifono o Komiti Faa-Palemene eseese faapea sui usufono mamalu na filifilia ma tofia aloaia mai e itumalo taitasi o le atunuu e fai ma o latou fofogaaga i le Fonousu a Samoa. Faamalo le usufono.

E faatalofa atu foi i le saofaiga a Ofisa Sili o Pulega o Matagaluega eseese ma Faalapotopotoga Tumaoti a si o tatou Malo.

E faatalofa i lau Susuga i le Failautusi o le Maota faapea le aufaigaluega galulue. Faamalo faafetai mo le tautuaina o le Palemene i taimi uma e tauaofia ai le Fono Faitulafono a si o tatou atunuu.

E faatalofa aloaia atu foi i le faafogafoga tapuai mai o le paia maualuga o Samoa o lo o afifio ma papaaao i atunuu mamao.

E faatalofa atu i aiga uma, o nai fanau pele, o uo ma e masani o lo o tatalo ma tapuai mai. Lau Afioga i le Fofoga Fetalai, e ui lava foi ina ua faia se tasi o poututoa o le Maota ua le mafai ai ona nofoia le nofoa o Tavita i le itumalo o Lefaga ma Faleaseela, le Afioga a Vaafusuaga Ken Poutoa. Ia ua le o faia so outou finagalo po o so matou loto, ae o le pule tutoatasi a le Atua i lo outou soifua ma so matou ola. Tau ia ina faamaise ma faamafanafana le agaga o le Atua i le faletua ia Vaelaa ma si o la alo, aiga na lua faapea le paia maualuga o le itumalo, aemaise foi le Maota nei, ona o Lana valaau paia. Tatou tatalo faatasi ina ia maua sona nofoaga mau i le ola e faavavau.

Lou itumalo pele Gagaifomauga Nu.1, o le a i ai se taimi ona ou afe atu lea aua e faigata i le auauna la outou pule to, la outou faaaloalo, la outou tatalo ma la outou tapuaiga, ae tapuai maia. O le a ou faaogaina lenei avanoa e molimoli ai la tatou faafetai e pei ona outou moomia e tusa ai o le maau o si o tatou Malo i lenei Nofoaiga e pei ona ua tatou aeae ai i le tele o faamanuiaga.

Lau Afioga i le Taitai, ou te iloa lelei lau Afioga e te le manao i ni viiga po o ni mamalu, ae malie maia, tau lava ina ou faaleo le faafetai tele a si ou itumalo, ona o lo o faafogafoga mai, o i latou na tusiaao ua ou seei ai i le nofoa o si o matou itumalo.

Lau Afioga i le Fofoga Fetalai, lau Afioga i le Palemia ma le Faigamalo, e lagona lava le agaga faafetai ma le loto faagaetia i le Atua ona o Lona alofa faamaoni ia Samoa aua ua ia faailoa mai ma faaauala mai e ala i le taitaiga a lau Afioga i le Taitai ma le tatou Faigamalo mafaufauga lelei, lototetele, aemaise o lana meaalofa o lo outou soifua ma so matou ola, ua mafai ai ona tatou faia le tele o faaiuga lelei e ui ina faigata mo le manuia lautele o si o

tatou atunuu pele, i taimi o le sologa lelei ma taimi o faigata e pei ona tatou i ai nei i le Koviti-19 lea ua aafia ai le lalolagi atoa i lona maemaea ma lona sau. E pei ona malie i sausaunoaga a nisi o sui usufono mamalu, o nei e faufau, poupu ma faavae ai fuafuaga lelei mo a taeao.

Lau Afioga i le Taitai o le Maota lau Afioga i le Palemia, e le tau selu atu, o le faafetai a si ou itumalo. Ua faamalo le toa, ua faamalo le lototele, faafetai le tautua atunuu, malo le taitai i le faafoeina o le sa o Samoa, e ui i le tele o luitau ma tuuaiga le faavae o lo o tuuaia ai lau Afioga i le Taitai ma le Faigamalo. Lau Afioga i le Taitai, e faapena foi ona molimoli mai lagona o le agaga faafetai ma le agaga faagaetia o si ou itumalo, ona o lau pule to ma lau faaaloalo na e amanaia ma filifilia ai ma faaoga ai le sui usufono vaivai ma le faatauvaa o Gagaifomauga Nu.1 o se tasi o Minisita o le Kapeneta e ala i le Matagaluega o Tina ma Tamaitai, Atinae o Afioga ma Agafesootai. E 3 tausaga ma le 4 masina ae toe fesui ai lau faatofalaiga, ae e toe tofia le sui usufono o Gagaifomauga Nu.1 e tulai i le foe o le Matagaluega o le Soifua Maloloina seia oo mai i le aso. Lau Afioga i le Taitai, malo pule, faafetai le faaeaea i si ou itumalo o Gagaifomauga Nu.1.

Lau Afioga i le Fofoga Fetalai, o lele ua gagaifo le la ua faaifoifo ma faaiuiu le tele o galuega tetele sa fuafua, faataatitia ma faatino e le Faigamalo a le Vaega Faaupufai e Puipuia Aia Tatau a Tagata le HRPP, faatasi ai ma le lagolago malosi ma le galulue le faalogologotiga a le aufaigaluega a le Malo, o alo ma fanau a Samoa e faatino ma faataunuu a tatou fuafuaga ma galuega, pe a maea pasia e lau Afioga i le Taitai ma le Kapeneta.

Lau Afioga i le Fofoga Fetalai, o le taimi ua tatou toe tomanatunatu ma toe tepa i tua i le faagasologa maiga o lenei Paeaiga XVI a le Palemene ma faitau i le tele o galuega ua maea ona faatino mo si o tatou atunuu, ua ao ai ona tatou faapea, le Atua e, ua faamalo le alofa, faafetai le agalelei ia Samoa, matou te toe faafoi atu le viiga ma le faaneetaga i lau Afioga. Faafetai mo mea silisili ua faia e le Atua e ala i lau Afioga i le Taitai ma le Faigamalo, aemaise le aufaigaluega galulue i Matagaluega eseese ma Faalapotopotoga Tumaoti e tali atu ai i manaoga o si o tatou atunuu i so o se tafa o le soifuaga.

O lo o faapena foi ona molimoli mai le faafetai tele a si ou itumalo i lau Afioga ma le Faigamalo ona o le mafanafana o au faigapaaga ma a tatou paaga ma atunuu mamao, e le gata i lea o faletupe eseese e pei o le World Bank – le faletupe o le lalolagi, faletupe o le atinae o Asia ma isi aemaise o le toatele o tatou paaga o i latou o lo o alolofa ma agalelei mai o lo o maua ma ai le tele o seleni o lo o faatino ai le tele o galuega ma atinae o lo o talosagaina ma moomia e itumalo taitasi aua le manuia lautele o si o tatou atunuu. O faigapaaga ia o lo o sosolo i taiala o pulega lelei, malamalama, maioio ma manino ma sosolo i luga o faiga faavae o lo o lelei ona faatino. O se faailoga lea lau Afioga i le Fofoga Fetalai i le vaavaai mai a si o matou itumalo, o se Faigamalo e mapo ma mamao lana tofa, loloto lana

faautautaga, mamao ma lautele lana silasila, fetalai ana faaiuga fai i taimi lelei ma taimi faigata e fetaii ma si o tatou atunuu.

Lau Afioga i le Taitai ma le Faigamalo, ua silamio Samoa i le tele o galuega lelei, o atinae tetele ma le mau fesoasoani eseese ma le tele o faamamaavega o lo o tuuina atu i so o se vaega. O le a se tulaga o lo o tatou matauina lau Afioga i le vaavaai ma le tali mai a si o tatou atunuu? E lagona lava le agaga faagaetia ona o lo o vaaia le sagisagi fiafia mai o nai o tatou tagata i nuu ma afioaga e le gata i Upolu nei ae faapea Savaii i le molimoli mai o le agaga faafetai ma le agaga fiafia. O a upu o lo o molimoli mai? Lau Afioga i le Taitai ma le Faigamalo, se ua malo alolofa, faafetai talimanoa, viia le Atua i la outou tautua. Tatou te faafetai ai i le Atua aua tatou te le o saili i ni o tatou viiga ma ni o tatou mamalu, ae o lo o tatou o lava e faataunuu le auaunaga e tautua ai si o tatou atunuu pele o Samoa.

E pei foi ona tatou molimauina i Savaii i le faaiuga o le vaiaso lea na tea nei, o le alaga lava lea e tasi, faafetai, ua siitia le soifuuga pe a faatusatusa i le tele o tausaga ua tuanai i le mativa ma le le tagolima sa i ai si o tatou atunuu. O le alaga e pei ona molimau mai, Tuilaepa, e leotetele ma ma tautatala galuega faatino nai lo upu ma tala ma le tele o folafolaga. Ia viia le Atua. Ia, e faapena ona i ai foi se lagona faanoanoa, e pei foi ona i ai ma folafolaina, na valaau mai foi nai o matou tagata i si o matou itumalo fesili mai, Faimalo tai tele a tatou tupe, o lea ua fai mai e tai miliona e aumai pe a o atu i totonu. E tufa le tai miliona i itumalo. O lena ua outou faafofoga mai outou ia e tuu valaau mai. O ni folafolaga tau faasese ma tau faavalea. O le fesili lava o fea e aumai ai le tai miliona lea? E leai ma se vaega o le Tala o le Tupe o lo o tatou talanoaina nei o lo o i ai ni tupe o avanoa e tufaina atu. Ua maea faamanino e le Afioga i le Taitaifono o tupe a le Palemene. Pe i 3 ea laupepa i lau matau, le lisi o mea na maua mai ai tupe, o i latou na alolofa mai. O nogatupe mama avega na aisi mai e le Malo, e faataunuu ai ma fesoasoani atu i atinae o lo o faapena ona tagi mai ai le atunuu.

**SUI FOFOGA FETALAI:** Malie le sui usufono lau Afioga i le Minisita se i tuu atu le avanoa i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O pepa nei o lo o ou umia, o le Tala Autu lea o le tatou Tupe, e faaiu nei ia Iuni i le 2021. O lea sa tofu uma lava sui o le Maota lenei faapea foi ma sui usufono o lo o tete mai i le Malo. O lea la o lo o matamata tetele mai i le itulau lea i luma. Se taimi ona saunoa lea o le Minisita o Tupe, ae na o le pau lava lea. (i) faasolosolo mai lava tatou tupe maua, tau mai loa i tupe alu, ona sau loa lea o le faasiliga o tupe alu na i lo tupe maua masani. O le faasiliga la lea, e \$127 miliona ua sili ai le faaalu na i lo tatou lava tupe maua, lea e faalupe o le deficit, po o le tefisiti po o le faaupuga a Asiata foi lele sa i totonu o le Palemene, o le

tefesiti. O le a la le uiga o le tefisiti? Ua ova mamao le faaalu, ae i le tulaga la ou te fia taua. Ona o le upu lava lea o la e tele tupe, tatou te o atu loa i totonu, faasoa. E faasoa la se tefisiti? Lau Afioga i le Fofoga Fetalai, o mea ia e faamaumau, e \$127 miliona i le 2020 i le 2021, e ova ai le tatou faaalu na i lo tatou tupe sau i totonu. Ae mafua i se a ona mafai ona tatou mafai ona faaalu ia lea fuanumera tele. Lau Afioga o le alofa mai o Faalapotopotoga ia Samoa, ona o le lelei faafae o tatou seleni ma a tatou atinae o lo o fai. O lea la o le a ou toe faailoa atu ia i latou o lo o faia ni folafolaga faavalevlea faalauaitete, e \$127 miliona le mea ua ova ai le tatou faaalu, na i lo tupe maua. E leai se isi mea e sili atu, o le manino, o fea la e aumai ai mea ia e tufatufa. Lau Afioga i le Fofoga Fetalai, ua matua manino, e leai lava se mea o nanaina e le Malo. O lea e alu atu i totonu i i, e na ona ou faaemo leaga o lea ua oo i ai le saunoaga a le Minisita. Ae ou te lagona, o le a faalautete e le Minsita o Tupe, ae ou te lagona o le pioga tonu lava lea ua ou tulai atu ai. Ina ia faafogafoga mai ia le tatou atunuu, i lenei mea o le taufaavalea, taufaavalea, taufaavalea. Malo faafetai.

**SUI FOFOGA FETALAI:** Malo faafetai, o lea ua saunoa manino lau Afioga i le Taitai o le Malo, o lou tiute lava lea ma le matafaioi.

**Susuga Hon Laauli Polataivao Leuatea:** Lau Afioga i le Fofoga Fetalai, pe maua se avanoa. Pe maua lava se avanoa faamolemole lau Afioga.

**SUI FOFOGA FETALAI:** E faatatau i le...

**Susuga Hon Laauli Polataivao Leuatea:** E faatatau o le faamalamalama o le taufaavalea lea ua fai foi.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o lea ou te tulai atu, o le faalauteteina o le mataupu a le Minisita o lo o saunoa nei.

**Susuga Hon Laauli Polataivao Leuatea:** Lau Afioga o lea e faafogafoga le atunuu, o matou e ona le upu faamolemole. Ia malie lau Afioga i le Palemia, i le matou lava o faiga faavae.

**SUI FOFOGA FETALAI:** O lea la ua maua atu e le Maota. O lona uiga o lea sa fai ni saunoaga faapea, aua e leaga e le o taua lava ni suafa.

**Susuga Hon Laauli Polataivao Leuatea:** E le o natia, lau Afioga i le Fofoga Fetalai, o le matou lena menifeso lena o lea e faalauiloa. O lea e saunoa i ai le Taitai o le Malo, malie, se tuu mai pea na i a matou faalauiloa.

A matou omai, e le taua atua mea matou te maua mai ai tupe, e faatino ai mea ia. Ae le faapea ua matou fai atu... matou te le follow i a outou faiga faavae. O le mea sili lea ua tau, e \$100+ miliona le tupe gau a le Malo talu la outou taitaiga.

**SUI FOFOGA FETALAI:** Malie le sui o saunoa se i tuu atu le avanoa i le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ou te toe agai lava i le tautoga lea na fai i i. Afai e te tauto pepelo i luga o le Tusi Paia. E faapefea ona toe talitonu se isi ia te oe, e na o mea pepelo, mea pepelo mea pepelo e te faia. Lau Afioga o le tulaga lena e tatau ona ou faasaoa.

**SUI FOFOGA FETALAI:** Ia malie sui o lo o fia tutulai mai...

**Susuga Hon Laauli Polataivao Leuatea:** E le tuua upu ia e alu faamolemole. Ioe, e i ai le taimi, Tuilaepa e i ai le taimi e te silasila i ai i le mea lea e te atugalu i ai...e i ai le taimi...

**SUI FOFOGA FETALAI:** Malie Laauli o lea ua ou fai atu le tala a le Nofoa. Alaala i lalo. Laauli...E lelei ona ou toe tuualalo i le paia o le Maota aemaise le sui usufono, Gagaifomauga Nu 3, ia utagia se taumafai atu o le Nofoa. O le tiute lava o le Nofoa o le faasagatonu o Tualumaga o le tatou Fono, o le tiute lea o le Nofoa. O le mea lea ua faamuta i i, le mataupu lea.

E talu ai o lea ua tatou taunuu mai i le tatou taimi malolo, e faasilasila atu, o le a faataatiaese Galuega a le Maota mo lana malologa masani.

*Na faataatiaese Tualumaga a le Fono Aoaio Faitulafono ma lana malologa masani i le itula e 7:50 i le po, ae toe amatalia i le itula e 8:35 i le po.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu 1) 2020/2021.*

**SUI FOFOGA FETALAI:** Ou te faasilasila atu ua toe amatalia nei Tualumaga a le Fono Aoaio Faitulafono. E i ai le talitonuga ua maua se faasiligamalosia i le paia maualuga i le Palemene, i le taliga o le sua ma le tautega.

E faataatiaese Galuega a le Fono Aoao i lana malologa, o lo o saunoa le Afioga i le Minisita o le Soifua Maloloina. Ou te tapa lau Afioga.  
Se i tulai mai lau Afioga i le Minisita o Galuega.

**Susuga Hon Papaliitele Niko Lee Hang:** Faafetai i lau Afioga mo le avanoa. Sa tau saili atu lava se avanoa e le i faia le malologa. Ua ou tulai atu ma le faaaloalo, e 2 mataupu ou te fia talanoa atu i ai. Muamua, o le mataupu e fia faasao, ma le mataupu e fia faamalamalama. Lau Afioga i le Fofoga Fetalai, sa ou Minisita o Tupe i le tausaga e2025 i le 2011. O mataupu foi ia sa laga, lea na saunoa i ai le Afioga i le Palemia. Le mea lava lea o le deficit, lea sa fesiligia ai e le Afioga ia Asiata. Ma faapea mai ua gau le Malo. O lea foi la na toe saunoa i ai le Taitai o le aiga e Faatuatua i le Atua e tasi, le Afioga ia Laauli. Ma saunoa mai ua gau le Malo. Mo le silafia, o mea ia o ia o tala o tupe, o mea o estimates, o budgets, e le mafai ona iloa ai ni tupe gau ma ni tupe mama. E pau lava tupe e atagia mai budget, na o tupe foi ia oe tefisite deficit ma surplus. Na o matou ia o account ma audits, e malamalama lelei i faamatalaga ia e sau i le tala o le tupe. O le saunoaga lea a le Taitai o le aiga o le Faatuatua i le Atua ua tasi, e matuai sese lava. E le o gau le Malo, o lea e atagia mai i i, o le tupe deficit e saili e le Malo se tupe e toe faaatoa ai, ina ia mafai ona faatino galuega, aemaise la galuega tetele. O lea e faamoemoe i grants. Ae pei o le tau faasaoga la, leaga o la e faafofoga mai le atunuu. O lea ua sau lava lenei saunoaga tele lava e le faamaonia ua gau le Malo. E le o gau se Malo, o tupe pau, e eseese le loss ma le deficit. O le mea la lea lau Afioga e fia faasao, ma toe faamalamalama ai le mea lea o le deficit ma le loss. O lea e saunoa ia le Afioga ia Laauli ua gau, o lona uiga o le loss. O mea ia o tala o le tupe, e le iloa ai ni tupe ...vagana ua aumai actuals. Ona faatoa iloa lea o le tupe mama ma le tupe gau. A o le tulaga lea o le tatou tala o le tupe, o estimates. E le o tau mai ai se tupe ua gau. O le tupe ua pau, ae toe saili e le Malo se tupe e toe faaola ai ma faaauau ai galuega o lea e fuafua e le Malo i le tala o le tupe i lea tausaga ma lea tausaga. O le tulaga lea lau Afioga leaga o lea e ave seseina e ituaiga faamatalaga ia. Ou te le iloa la pe faafefea ona o mai e taitai le Malo, a o documents ia, e tatau ona silafia lelei lava, aua o i lea e faasoa ai le tamaoiga o le atunuu. A le malamalama la i i, e faafefea la ona omai e faaoga le fia miliona, ae le o i iloa po o fea e aumai ai nei miliona. E na ona ou fesoasoani atu i le saunoaga a Laauli, leaga e sese.

**SUI FOFOGA FETALAI:** ia faafetai, malo saunoa i lau Afioga i le Minisita o Galuega.

**Susuga Hon Laauli Polataivao Leuatea:** Lau Afioga i le Fofoga Fetalai, pe maua lava se avanoa leaga o lea ua tau faaselau lo ta igoa.

**SUI FOFOGA FETALAI:** Malie Laauli se i ave muamua le avanoa i le sui usofono mo Alataua, ona tuu atu lea o le avanoa.

**Afioga Aliimalemanu Alofa Tuuau (Alataua Sisifo):** Faafetai mo le avanoa lau Afioga i le Fofoga Fetalai, ona o lou tulaga Faaitaifono o le Komiti o tupe. O lea tatou te talanoa i le Tulafono o Tala faatatau o tupe. E faafetai i lau Afioga i le Minisita o Galuega. O le tulaga tonu lava lea sa tau agai atu i ai se tala na ala ai ona tulai. O le mea lea ou te talosaga ai, se i faamalamalama mai lava e le sui o Gagaifomauga Nu 3, le mea e sau ai le \$100 miliona o le gau a le Malo lea na saunoa ai, leaga e le logomalie ia i matou nei e i le Komiti o tupe, le faalogo atu i saunoaga nei. A o lea sa maioio lelei ia le faamaninoina o Tala Faatatau o tupe e pei ona saunoa le Afioga i le Minisita ia Papalii. E ese le mea e tau o Tala Faatatau, po o fuafuaga, ese mea e tau o Tala o Faamatalaga o tupe po o actuals. O le vaega la lena, seiloga e uma ona sue e le Ofisa o Suetusi sili faatoa aumai. O lea e ia au faamaumauga o le Paeiga lena 2015/2016. O le deficit sa i ai e \$11 miliona o tupe mama ina ua uma ona sue tusi, e \$28.9 miliona. O le 2016/2017, o le deficit na e i ai, e \$84 miliona i le Tala Faatatau o le tupe. A o faamaumauga ina ua uma ona sue tusi, o tupe mama, e \$63.8 miliona. O le 2017/2018 o le deficit na i ai e \$2.1 miliona tala faatatau. Ae oo mai ua maua mai faamatalaga o tupe ua uma ona sue e \$30.9 miliona tupe mama. O le 2018/2019 e \$12.8 le deficit o Tala faatatau o le tupe po o le budget. O le faamatalaga o tupe ua uma ona sue e suetusi, o tupe mama e \$47.6 miliona, na ona faapupula atu faapena, ae ou te fia malamalama, po o fea e sau ai le \$100 miliona lea o le tupe gau ma le faaaloalo.

**SUI FOFOGA FETALAI:** O le taua ia o le avanoa na tuuina atu i lau Afioga i le Taitaifono o le Komiti o Tupe, aua o outou sa gafa ma le galuega tele, sa maioio lelei a outou suesuega, autalu uma vaega uma. Faafetai mo le faamaninoga, ae o le a tuu le avanoa i le Afioga ia Laauli, le sui usofono mo Gagaifomauga Nu 3, leaga o lea na e tulai mai.

**Susuga Hon Laauli Polataivao Leuatea:** Ia malo faafetai, o lea lava na ou mulimulitai i le folasaga a le Taitai o le Malo, leaga o lea sa tuuaia ai, e faapea mai o a tupe o le a matou o mai e faasoa, o lea e gau le tala o le tupe. O le upu lena o lea na ou tulai atu ai. Po o fea lava le fenumiaiga, pe deficit pe loss pe pau, o le gau lava o le gau.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ou te le i faaogaina le upu lea gau. O le mea e fia faasao, ou te le i faaogaina se tupe gau, na ou faaogaina le upu deficit. Se o le mea lea e leaga ai le talanoa o le tagata i mea tau tupe ae le malamalama. E ese mamao

lava, o lea na saunoa mai le Taitaifono. E eseese mea, e ese lava le estimates ese actuals, ua e malamalama. Ou te le i faaaogaina se upu gau, vagana le tagata e le malamalama i mea tau tupe, na te faaaoga le upu lena gau. Atonu foi e masani lava oe i au gau.

**SUI FOFOGA FETALAI:** O lea ua manino le saunoaga a le Taitai o le Malo.

**Susuga Hon Laauli Polataivao Leuatea:** Ia faafetai. O le mea lena o lea sa ou taumafai ou te tulai atu lau Afioga, leaga o lea na ou mulumulitai

**SUI FOFOGA FETALAI:** Ave muamua le avanoa i le isi sui o Gagaifomauga Nu 3 lea e saunoa mai. Ave muamua le avanoa ia Laauli.

**Susuga Hon Laauli Polataivao Leuatea:** O le tupe pau, o le a la le mea e tau o le tupe pau? O le isi tau o le tupe pau o le gau. Ioe, e tou te fiu lava e fetaaisol, ua pau le tupe e le lava tupe e fai ai le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le faasaoga. O le upu lea sa ou faaaogaina atu, o upu ua sili ai ia le faaalu na i lo le tupe maua, fuafua. Ua e maua mai? fuafua, o lona uiga, estimates. E eseese le estimate, o le tupe fuafua agai i luma. O lea e te talanoa agai i le 12 masina lea e i luma. Seiloga la e te oo i o ia Tesema ona faatoa e talanoa loa lea i actuals. O lona uiga, o tupe moni na maua, ma tupe moni na faaalu. O le eseese o le mea na, o lea e faasamoaina o le faasiliga, o le siliga o tupe maua na i lo tupe alu. Ou te faaaogaina le upu lena, leaga e eseese mea. E i ai le uiga o upu, o le ala la lena, aua e te faaaogaina upu sese, ua atili ai ona e sese.

**Susuga Hon Laauli Polataivao Leuatea:** Si mea laititi lava lea faauma ai lau tala, leaga o lea ua ou vaai atu ua lagalaga finagalo.

**SUI FOFOGA FETALAI:** Malie lau Afioga i le Minisita se i tuu atu pea le avanoa...leaga o lea ou te iloa le eseese o upu e 2.

**Susuga Hon Laauli Polataivao Leuatea:** Se tuu mai pea faamolemole. Tuu mai se avanoa Honourable Speaker aumai sou avanoa. O le mea lea tou te atugalai ai faapea, pe faafefea ona matou omai faatupe mea ia. E matou te le folo ia outou mea gau lea mo le taimi lena. We are not follow those, we were reform the financial institution of Samoa e maua mai ai tupe e fai ai mea ia. O le faamalamalaga saoga lena. O lea e tuufesili nei...

**SUI FOFOGA FETALAI:** Se i tuu atu le avanoa i le Malo.



**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e fuafua uma lava mea, i au polokalame e fai. A e sau la e talanoa mai e tufa, e leai lava ma se Malo e aumaia se tupe. E leai ma se Faalapotopotoga e aumai se tupe, e leaga o mea na e inoino tele i ai Malo. Lau Afioga i le Fofoga Fetalai, o le tulaga lena, a e le mafai foi ona toe talitonuina se mea e te fai mai ai. Aisea? Ona o lea ua lauiloa lou pepelo i i, i lau tautoga. O fea la na e toe...e leai se isi e toe talitonu ia te oe..

**Susuga Hon Laauli Polataivao Leuatea:** O lou lava lena finagalo, that's your own opinion...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** leaga o lea na e tauto i luga o le Tusi Paia, ma e pepelo ai le mafaufau.

**Susuga Hon Laauli Polataivao Leuatea:** E i ai le taimi e faasao ai le mea lena.

**SUI FOFOGA FETALAI:** Malie alala i lalo se i maea le saunoaga a le Malo ona tuu atu lea o le avanoa ia te oe.

**Susuga Hon Laauli Polataivao Leuatea:** Si mea laititi lava lea, faamolemole lava Nafoitoga. E \$116 le tupe pau a le Tala o le tupe lea e faaalu nei, o le Tala o le tupe autu. O se matou mataupu lea e tau fai atu nei, faamolemole e ese lava a matou faiga faavae, e o mai faatu faiga faavae fou, tatou te le toe talanoa ai i ni deficit ma ni gau. E faatupe mea uma nei e alu i luga i le mea e maua mai ai tupe fou. Ma le isi mea, e le o se tufagatupe lea e fai. E faaagaga le miliona mo le atunuu, ae le o se tufagatupe.

**SUI FOFOGA FETALAI:** Se i tuu atu le avanoa... malie ia Laauli. O lea ua maua lou finagalo. Tuu le avanoa i le Malo se i tali, e pei lava ina ou fai atu, a faa-fitu lava ona e tulai mai, e faa-valu le Malo. O le tali mulimuli lava o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le mea lea ou te tulai atu ai, e le mafai ona talanoa se tagata malamalama e pei lava o upu a le Tusi Paia. E sili ai ona e talanoa i le manufeai, i lo lou talanoa i tagata faapea. Aua foi e faigata tele ona talanoa atu, ia matou nei e malamalama i mea tau tupe ma lau Afioga, aua e te le malamalama. A lea e gau ai au pisinisi. E sao au? O lea ua gau ai au pisinisi, o lea ua faatau isi, e faapefea la ona e sau i i, e te talanoa mai...Ua uma ona ou talanoa atu.

**Susuga Hon Laauli Polataivao Leuatea:** Lau Afioga i le Fofoga Fetalai, e te tuufaua upu ia. Tuilaepa e te le i faia lava se pisinisi talu ona e ola. You have no experience to do a business.

**SUI FOFOGA FETALAI:** Se i maea atu... Laauli

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le pisinisi lea ou te galue ai, o le pisinisi tau Malo. E a, ua e maua mai, lea na mafua ai ona ola pisinisi a le atunuu, ma ola ai ma lua pisinisi ma Peseta, lea na e alu ai ma le \$3 miliona. O le a faapefea nei la ona e fai mai e leai sau pisinisi. O le pisinisi a au, o le pisinisi i le tulaga o le fausia o Malo...

**Susuga Hon Laauli Polataivao Leuatea:** That's contempt of court. That is absolutely contempt of court. O lou toe saunoa i mea ua uma ona fai i ai le faaiuga a le faamasinoga. Lau Afioga i le Palemia, se soia ua lava lena tautaaaleaga. E leai se eseese o le mea lena ma le fasioti tagata.

**SUI FOFOGA FETALAI:** Laauli, malie lau Afioga ua uma ona ou faia le faatonuga o le Maota leni. E agai uma mai outou finagalo i luga o le Nofoa ona avatu lea o le faatagaga. O lea lava sa manatu e faamaea atu le Malo, ona tuu atu lea o le avanoa. Ae pei e foliga mai ua pule lava lau Afioga i le mea e te finagalo i ai. O le tiute lena o le Nofoa e faasagasagatonu taulumaga o le Fono Aoao. Ia tausii pea le mamalu, tausii pea le mamalu. O le mea la lea, e le tatau ona toe tulai mai le mea lea, e le tatau. E pei lava ona ou fai atu i le taimi ua sola, le paia e o usufono mamalu o le Palemene, o le faasoesa pea ma le usitai pea i le taumafai atu o le Nofoa, e i ai ona aulape. O le mea la lea, ou te talosaga atu ai, malie, utagia se taumafai atu ma se tautaaulemau a le Nofoa, ina ia mamalu le Fonousu a Samoa.

Tulai mai lau Afioga i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E faamalulu atu, o le tatou Fonotaga o lea e tali le Kapeneta e faamalamalama ia mataupu, e pei ona laga ai i saunoaga a sui. Ae le mafai foi ona see ese le Kapeneta leni pe a fai e tutulai mai pea ia le tulaga...leaga o lea e talanoa atu le Kapeneta i mea faamaumau, mea faamaumau. A o le mea o le taumafai e milomilo upu i totonu o le Maota leni, e faigata tele ona matou taofiofi. O le mafuaaga ona o le tele o le tautaaese lea e fai i fafo atu o le Palemene. Ona faigata ai lea ona onosaia o upu soona lafo i fafo atu o le Palemene, o le ala lena o lea e taumafai lava e onosaia. Ae o lea e tali le Kapeneta, se i maea lelei ia ona tali atu le Kapeneta ma malamalama ai mataupu. O le ala lea o lea matou te tulai atu ai e faamalamalama. E faigata tele ona matou talanoa atu e

malamalama i mea ia, ma le taofiofi mai a latou e le malamalama i le tala o le tupe, e pei o le tulaga lena. O lea foi e faafogafoga foi lo tatou atunuu. O le faataitaiga, ua fiu e faamalalama le \$11 miliona lea sa laga mai foi i le tatou Fono talu ai. O lea e i totonu i i. A o le a le mea lea e tupu? E o fai talaiga o la e tau sue miliona e fia ua le iloa. A o lea na faasao i totonu i i. Lau Afioga i le Fofoga Fetalai, o le ala lena o lea matou te tutulai atu ai pea, ona o le tele o le taufaavalea lea e fai atu i fafo o le Palemene. O lea o le a tauau ina lagalaga ai manatu, ae se i tuu maia se i faaauau le matou galuega.

**SUI FOFOGA FETALAI:** E masalo o lea ua manatu e faamuta ai i i le talanoaina o le mataupu lea. O le faaiuga foi lea o le mataupu.

**Susuga Hon Laauli Polataivao Leuatea:** Malie Nafotoa, ua ou talia ma lou agaga, e pau lava lea faamolemole. Ia paleni le avanoa leaga o lea e tele upu mamafa lea e lafo mai e le Taitai o le Malo. Ua sopo ai i le la itu, ua uma ona fai faaiuga. O le ala lea o le matou tutulai atu, e le talia i vai upu ia.

**SUI FOFOGA FETALAI:** Ia malie le sui usufono o saunoa, ua uma ona fai atu le tala a le Nofoa, aumai pea i luga iinei ona faatonufofola lea o le Nofoa. Ae le o le tulai mai lava ma fai lava, ae o lea e taumafai atu se lagona vaivai o le Nofoa. A o lea ua ou faamutaina le mataupu lea. O le Malo o le tali mulimuli lea o le mataupu lea. Ou te tapa lau Afioga, i le Minisita. Se i ave muamua le avanoa i le Minisita o Galuega tetele a le Malo.

**Susuga Hon Papaliitele Niko Lee Hang:** Lau Afioga i le Fofoga Fetalai, faafetai mo le avanoa. O le mataupu lea sa ou laga, ma ou te manatu ou te le manao e moea le mataupu lea, i le tulaga lea e saunoa i ai Laauli e faapea mai. O le tupe pau lava o le tupe gau. E matua eseese mamao, mo lou silafia lau Afioga i le taitai o le tou vaega. E ese tupe pau, ese tupe gau, o lea ua uma ona faamalalama e le Palemia, fesoasoani mai le Taitaifono. O le tupe gau, pe a maua actuals, ona maua ai lea o le loss ma le profit. O estimates ia tatou te talanoa ai, a le lava tupe mai tupe ia e fuafua e aoina, e tele tupe e faaalu ona tefisite lea o le mea. Ae a i ai foi se faasiliga, ua tau o le surplus. O le eseese lena, leaga o lea e te faasesea le mea, a o lena foi ou te iloa e te malamalamama lelei. Ua leva foi ona e i totonu o le Palemene, e te silasila i Tala o le Tupe i tausaga uma i tausaga uma, ae o lea e foliga mai e te le o malamalama.

**Susuga Hon Laauli Polataivao Leuatea:** Lau Afioga o lea ua e saunoa ua faamuta le mataupu. O le a e finagalo la e toe tatala le avanoa, Papalii fight for justice, remember your word. E aupito sili lava ona e tomumu a o le i Minisita.

**Susuga Hon Papaliitele Niko Lee Hang:** Ia faafetai...in justice...O le Atua e faamasino, e sao na ou tomumu i le taimi lena na finau ai, ae o le taimi lenei, ua ou talitonu. I believe in Government 101%, ae leaga o lau Afioga, ua tatou faatasi faatasi...

**SUI FOFOGA FETALAI:** O le avanoa na ou tuua i le Minisita, ona o latou e i ai le tiute lea, malie lau Afioga i le Minisita ou te tuualalo atu ma le agaga faaaloalo, aua ne i popona le toa pe faoa i le ta lou tofa a lau Afioga.

**Susuga Hon Papaliitele Niko Lee Hang:** E faamalulu atu i lau Afioga, e pau lava le mea ou te manao e faasao a o vevela le uamea. O lafoga ia e faapea mai e tutusa le tupe pau ma le tupe gau e va i Sasae ma Sisifo le eseese. Ona e le malamalama i terms faa-suetusi faa-tausitusi, ua leva ona malamalama.

**SUI FOFOGA FETALAI:** O lea ua avatu le faaiuga a le Nofoa, o le tali lena, o le faaiuga lena o le mataupu lenei, o lea ua saunoa i ai lau Afioga.

**Tofa Lealailepule Rimoni Aiafi:** Lau Afioga i le Fofoga o le Fono, e lagona lava le faanoanoa i lenei afiafi. O le tuualalo atu i lau Afioga, vaai tautuana ma oe le mamalu o le tatou Fonotaga. Ua 15 ou tausaga iinei, faatoa ou vaai lava lea i ni tulaga faapea. Ua e saunoa soo foi i aulape aulape aulape, o lea o le a amata. O lea ua e tagai i ai i le mea lea ua tupu nei. Se i tautuana ma oe le tatou Fono, tautuana ma oe le tatou Fono...

**SUI FOFOGA FETALAI:** Malie le sui usufono o Faleata, lafo pea ia Pili le faiva o Pili. O lea ua maua le fautuaga, faafetai le manatu mai.

**Tofa Lealailepule Rimoni Aiafi:** Se i fai la si ou manatu laitiiti lea malie le finagalo i le mataupu lea. E moi o la ua aumai o lau tala, na ma omai faatasi ma Laauli i totonu o le Palemene, ua leva na i i Fiame. E ma te omai i le Palemene lenei, ua leva lava ona i ai. E i ai le tupe pau, deficit, ae uma loa ona fai actuals, toe foi tupe i mea na i ai.

O lou la manatu, e ese lou faanoanoa, afai o lea na i ai i totonu ma i ai le tomai lea, fea na tuu ai na reforms? Fea na tuu i ai? Na fai ni la fautuaga i le Malo? Talu ona ou sau iinei o i ai le upu lea deficit. Talu ona sau iinei e leai se bankrupt e tasi.

**SUI FOFOGA FETALAI:** Malie lou finagalo, Lealailepule...

**Susuga Hon Laauli Polataivao Leuatea:** Lau Afioga, o lea e ta te tulai atu ae o lea e faataga lava le saunoaga a Leala e alu. Se malie, malie

Nafaitoa, o le a faataga le saunoaga e alu, you just came in yesterday my brother, ua leva ona foi oe...

**SUI FOFOGA FETALAI:** Laauli o lea ua uma ona ou faamalulu i le sui usufono mamalu. Alaala mai i lalo.

**Susuga Hon Laauli Polataivao Leuatea:** Ua leva ona e tomumu foi oe.

**Tofa Lealailepule Rimoni Aiafi:** Vaai la i le mea lea.

**SUI FOFOGA FETALAI:** Ua ova lou soli Fono. Laauli ua leva i le Maota. Sa e i le Nofoa foi, e le taugamalie, ae o lea lava e tuu tuu atu ia le avanoa i le tulaga o le tatou nonofo ai. O le mea la lea, ua faamuta le mataupu. O lea ua tali le Malo, o le iuga foi lea o le mataupu o le ua latou faamanino uma tulaga uma. Saunoa lau Afioga i le Minisita o le Soifua Maloloina, o lou avanoa lenei.

**Tofa Hon FAIMALOTOA KIKA IEMAIMA STOWERS:** Ia faafetai i lau Afioga i le Fofoga Fetai, faafetai mo le tele o faauilavea, atonu ua aoga foi lea i le faafogafoga mai a Samoa, ma o latou faamasino mai, le moni, ma le le moni ia o le mea lea ua finau ai nei. Ia ae ou te talitonu ua aoga foi, faafogafoga mai a si ou itumalo, o e na... masalo na mafua le mea lea ona o le faamalamalama faaopoopo a le Afioga i le Taitai, e tusa ai o faafesili, ua valaau mai. E le i maua lava sou avanoa ou te alu ai i Savaii ina ua maea le asiasiga lea i si ou itumalo, e na ona valaau mai lava, e moi i, e moi o, ae ou te musu lava e fai ia ni faamatalaga, ona ou te le manao e olegia le Maota lenei. Se i ou oo e faafesagai ia ona ou malamalama lea.

Ae faafetai tele atonu ma e le o se mea e taumate lau Afioga i le Fofoga Fetalai, o le vaega tonu lava lea o lo o tatou lototetele ai pea. Taitaiga ma le faamalosiua a le Taitai o le Vaega Faaupufai lenei, toatele lava o le Maota, o le HRPP, lafoai ia i le Atua. Ia o la ta ita foi lea, ia ona o lea ua umi le taimi o va lata lauga, o le Atua e ati lana silafaga i so o se tagata, i so o se mea, i le moni ma le le moni, ia po o a tuuaiga, faavaea ma le le faavaea, silasila le Atua e ati lana silafaga.

Lau Afioga i le Fofoga Fetalai fai mai a o i ai Iesu e tatou te malamalama uma i le Tusi Paia, lo tatou Alii Faaola i ona puapuaga i le taimi na maliu ai i luga o le Koluse mo le faaolataga o tatou taitoatasi, ma le lalolagi atoa, na ia alaga ai ma le leotele i Lona Tama ma faapea, 'Lo'u Tama e, ia e faamagalo atu i ai latou aua ua o latou le iloa le mea ua o latou fai'. O sina fautuaga lena mai i si o ta ita sui usufono lea ua fao lota avanoa. Ae ui i lea, faafetai i lau Afioga i le Taitai, Faigamalo, e tatou te le o apoina le pola motu i tua, ae o lo o faagasolo pea galuega aua le atunuu o tapuai mai.

Lau Afioga i le Fofoga Fetalai, ia se i maea atu le faaleoina o le agaga faafetai i si ou itumalo na faatonuina mai ai au, ia ae ou te le i see atu e faia le folasaga i le auaunaga a si o matou Matagaluega o lo o tapuai mai. Lau Afioga i le Taitai ma le Faigamalo o le tele o galuega ma atinae tetele e pei o le tele o auala tetele, laupapa, sima o mea o le faaleleia o le suavai, o eletise, auala galue malae vaalele ma isi auaunaga e tele ua siitia ma faaleleia, ia o le a ou le toe oo i ai.

Ae ou te fia faailoa aua le faafofoga a Samoa, aemaise o le faafetai a si ou itumalo, i le Faigamalo. Ua inu malie si ou itumalo Gagaifomauga Nu.1 i lou maau ma lou faaaloalo, i le tele o galuega na faatino mo si ou nei itumalo, i lenei Paeaiga i le 5 tausaga ua faaiuiu. Faafetai ai i le Malo i ana fuafuaga alualu mamao, e ala i Afioga i Minisita ma Ofisa Sili ma le aufaigaluega, tele o mea ua mafai ma ua vaavaai i ai ia silasila ia itumalo eseese i Upolu nei ma Savaii.

Faafetai ai foi ia si o matou nei itumalo, e pei foi ona saunoa le Minisita o Tina ma Tamaitai le Afioga ia Tuitama, faafetai lava ua maea la matou taiala mo le atinae o si o matou itumalo. O le matou District Development Plan, o lea ua i ai uma i totonu, finagalo o le matou itumalo, tuufaatasia i mea e pito sili ona moomia, e atinae ai si o matou itumalo. E pei foi lava ona ou faafetai muamua atu i faigapaaga lelei i le talitonuina, na maua mai ai e si o matou itumalo se fesoasoani tau seleni mai i Iapani, lea ua faagasolo ai nei le faleaoga fou mo fanau aoga Tulagalua o si o matou itumalo. Ia aemaise foi, e faafetai atu ai i le Minisita o Aoga, Tamaitai Pule ma le aufaigaluega, le fausiaina o le malae taaalo o lea ua toeitiiti lava maea galuega teuteu o lo o faagasolo, aua le atinae o si o matou tupulaga i tulaga tau taaloga aua e talitonu e tasi lea o vaega e tele tupe e maua mai ai, e pei ona saini ai konekarate a isi tupulaga i le tele o taaloga pe a lelei ona atinae. Ia talitonu foi o lo o manatua e lau Afioga i le Minisita, tele ia o tamaiti Safotu ma tamaiti Manase, lea sa tautaua ai ia le tatou Manu Samoa talu ai nei. Taimi ia o tulai mai.

Faafetai foi si ou itumalo i le Afioga i le Minisita o Galuega tetele, le Ofisa Sili ma le Matagaluega. Ua toe fausia ma faaleleia atoa le auala o lo o faafesagai ma le vai o Safee e tau i uta i Paia. Ia ae e le gata i lea, faafetai tele lava, o lea ua toeitiiti lava maea nai vaega teuteu o totoe, mo le matou auala i uta i Safotu, i le agai atu i le mata o le vanu i Matavanu i le nofoaga o i ai le mata o le afi, lea ua logoina mai e ono tatala ma tuuina mai i si o matou itumalo i le masina fou, la outou pule lea faafetai.

Faafetai foi e ala i fesoasoani eseese mai i le Matagaluega o Faatoaga e ala i lau Afioga i le Minisita, le Pule ma le Matagaluega. Maea faatino le matou atinae o le faisua, faafetai foi mo faigafaiva o lea ua toe tatau pole fou. E le gata i fale mo le toe faaleleia o faigafaiva mo le aufaifaiva o si ou itumalo, o lo o saili i le sami ia le atinaeina o nai o latou aiga.

E le gata i lea, o le tele o mea ia e tufa atu o tiapula, fesoasoani mo le atinae o faatoaga, ili afi e fesoasoani i manu ainiu, o laau eseese a lea ua vaai lea foi ua fesoasoani atu i mea tau lafumanu. Ua vaai ua toe lafumo Samoa, meaituaolo ma vaega eseese e tua i ai le atunuu. Ua leai nisi o fia taumamafa pe a faatusatusa i le vaai atu i TV ma ala ata o faasalalauga mai i fafo aemaise i atunuu e tetele tamaoiga e pei o Amerika, le uumi o que laina, ae o lo o tutu mai ai toeaia ma loomatutua, fia maua se fasi meaai faaso mai se faguvai.

O fuafuaga alualu mamao lea a le Faigamalo, o faatino e le Taitai, o faatino e lau Afioga i le Minisita ma le Matagaluega mo nai o tatou tagata i taimi faigata, ia e pei ona o tatou i ai nei i le Koviti o lo o pagatia ai le lalolagi atoa.

Momoli mai foi le agaga o le faafetai tele mo le polokalame o galuega faavaitaimi, tele lenei fesoasoani, faamanuiaina ai...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai...

**SUI FOFOGA FETALAI:** Ia malie lau Afioga i le Minisita se i tuu atu le avanoa i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Ia, se i koma mai le sui usufono, o le mea foi lea e fai mai ma tau lelava onosai isi o le umi ona nonofo, ae manaia lava le fai ma tutu i luga.

Lau Afioga i le Fofoga Fetalai, e taua tele le mataupu lea na laga nei, i le faatusatusa o tatou ma ia atunuu i fafo. Na matua afaina lava i le Koviti, ae atagia ai i i le tele o le eseese lau Afioga i le Fofoga Fetalai, o le soifua o lo o soifua ai foi tagata i fafo i atunuu ia papalagi ma tatou, ona o atunuu i fafo e saili ia fale e rent ai nonofo ai. Ae o le tele foi o fale nei, masalo po ole tai-2 tai-3 fale i se tele o le eleele i le kuata eka. O lona uiga, e pau lava le mea e te nofo ai e na o lou fale lava. E le tele foi se mea e toto ai le laau. O le eseese lenei o tatou ma atunuu i fafo, aemaise foi tatou fanau o galulue i atunuu i fafo, a leai se galuega e leai se mea e maua mai ai se tupe e ai ai.

O le a la le mea e fai? Ia ona o loa lea i laina ia e vave tele ona totago ae fuafuaga a le Malo ma Faalapotopotoga, tapena ia taumafa ma tufa vai. Ia o lea foi e tatou te vaavaai atu i isi tagata papae, e laina i le paipa e tasi e tasi lava le laina ma a latou pakete e utu ai vai. Ae o le a le mea lea e tupu ia tatou? O lo o lava le lauelele e tatou te galulue ai. O le tele ia o le feau lea e molimoli mai, i ituaiga taimi faapenei e tutupu ai ia faalavelave tetele faapenei, ona tatou faapea ifo ai lea, faafetai i le Atua, ona o se atunuu e

lafulemu lona laufanua. Pau le timu e faasusu ai le laueleele, o le laueleele e oa i mea o minerale, e ola lelei ai ia taumafa.

Ia o lea la e tele ia tatou taumafa, a o atunuu e tele tupe, ia o lea e tatou te vaavaai atu o le tele o le pagatia. E na o sina manatu foi lea e tatou te manatunatu i ai, ona o le toatele o tatou, e ala ona tatou le tagolima, ia o le tulaga o le maua o le seleni, ae le fuafua tatau ma le tele o mea e soona faaalu i ai, ae le fuafua tatau.

Lau Afioga i le Fofoga Fetalai, e na o sina faasilasilaga lena, ae leaga e pei ona tatou vaai atu i le TV, ona tatou ofo ai lea pe mafua i se a? Ae o tua atu o ata na, o lea e taoto ai le tele o eseese, o tu ma aganuu a atunuu, ma le tele o faamanuiaga o tatou maua i le tatou Matai Sili i le lagi e tatou te faapea ane ai, amuia i tatou o tatou ola ae, i se atunuu na filifilia e le Atua, e tatou te ola e filemu ai.

**SUI FOFOGA FETALAI:** Tulai mai lau Afioga i le Minisita o le Soifua Maloloina.

**Tofa Hon FAIMALOTOA KIKA IEMAIMA STOWERS:** Ia faafetai i lau Afioga, e faapena ona molimoli mai le agaga faafetai tele i lau Afioga i le Minisita Lautafi, le Pule ma le Matagaluega i le polokalame leni faavaitaimi. Tele tele le fesoasoani ua faamanuia ai si o matou itumalo ua lata i le toa-100 ia matou tamaiti ua faamanuiaina nai o latou aiga. E faafetai ai i lau Afioga mo le tele o galuega eseese ua faatino mo le faamaopoopoina o nei polokalame.

Na valaau mai nai isi vaega o le Komiti o atinae o si o matou nuu. Na o le toa 37 na o i le la masina ua tuanai, pei lava o le vaiaso nei ea po o le vaiaso lea e o ai le isi toa-17, ae fai mai Faimalo, ia o le a o la tamaiti ae faafefea le palota? O lau tali na fai i ai, o le palota e uma nei i le Aso 9 o Aperila, aua le taofia tamaiti. Aua le taofia o, o faamanuiaga ia e puepue maua e atinae ai o tatou aiga. O faamanuiaga mo le matou itumalo, oka ua siitia tupe maua a nai aiga sa fai latou mea ae valaau mai ia matou i Apia se i aumai se tupe mo saogamea a le nuu, o taulaga. Siitia tupe maua a aiga ua fesoasoani i le tele o faalavelave ma le tausiga o aiga tautua Ekalesia i faiga taulaga eseese ma atinae o Ekalesia. Tautua ai galuega i totonu o nuu ma itumalo.

O le matou itumalo, se ua tele fale fou mananaia ua fausia mo le toatele o nai o matou aiga na le i lelei ni fale na nonofo ai. Faafou nisi o maota ua pei o fale fou. E pei e ofo le isi auvaega i le tele o taavale fou ua feoai i si o matou itumalo. Ae sa tau faanoi ia se taavale e ave ai se isi i le falemai ma mea na... So o le faafetai tele lava lea i le polokalame lea, tasi lea o vaega o faapena ona a matau i ia ia matou i Savaii, ia pe toa-5 i le toa-6 tagata e omai i Apia nei, faatoa maua le totogi o le tagata e toatasi lea e alu e saili seleni i polokalame lea faavaitaimi, faafetai tele lava mo leni polokalame faamama avega.



Faafetai foi si ou itumalo i le Faigamalo e ala i lau Afioga i le Fofoga Fetalai, ua faafaigofie mea uma ma ua tele le faamama avega ina ua maua e gasegase o le tino pe afai e maua nisi e gasegase. O lea ua i ai ia le matou fomai, ua le tau omai i Tuasivi pe oo mai i Apia nei seivagana ua moomia. O lea ua maea ona faailoa mai e le Minisita o Tupe, ma o lea ua i ai le tupe lea na aumai i le World Bank, e le o toe mamao lava ae roll out le polokalme lea e fausia ai maota fou mo fomai i afioaga uma o lo o i ai falemai faaitumalo.

Ia e faapena foi ia le a foi lenei... o lo o molimoli mai foi le agaga faafetai tele ona o le tele o fesoasoani, ae o le mea lea e tau avatu ai foi se tala e faanoanoa ai, ona o le tulaga foi lea e pei ona faitio mai ai le tele o sui mai i lo matou motu i Savaii i lena vaiaso. O lea ua lipotia mai foi i tulaga ua aumai i luga o upega tafailagi ma kilipi ma mea uma lava, e faapea mai ua malepelepe faitotoa o le falemai, e leaga moega leai ni moega, leai ni vailaau leai se fomai. Ia faamalulu atu i sui usfono o Savaii, o lea e molimau le Kapeneta i le vaitaimi o le misela, ia sa faapena ona asiase le Kapeneta tulimatai galuega mo le faaleleia i te i ua i ai se puapuga tele e oo i ai le atunuu. Na faafou uma ai le tele o mea, o moega e i ai lava potu o falemai taitasi o lo o faaputu ai moega ia sa teu atu. E le soona ave ifoa i fafo ma pefua ai fua ma tele le apo, e faapena foi o ieafu ma aluga ma mea uma sa tufa atu, o lo o i ai lava potu o le falemai o lo o teu ai ma nei. Ia e faanoanoa ai lava ona e le manaia i le faafofoga a le Matagaluega nei, o lo o faapena ona po, ao, po, ao e galulue aua le tautuaina o le tatou atunuu i le tulaga tau i le soifua maloloina. Ia o lena la ua faamanino atu.

Ia faamalie atu i le Afioga i le Taitaifono o le Komiti o Tupe, aemaise o si ou itumalo lea na sau ai le isi valaau, ia o le falemai lea i Sataua o le falemai e le i leva ona fausia o la e fou. Ia e pei o i ina sa sau ai le isi vaega o faitioga ia sa lau mai. Ia e faamalulu atu i sui usufono mai i Savaii, e pei ona outou faitio mai i lou nei tagata.

Lau Afioga i le Fofoga Fetalai, ua tele ma anoanoa ia le mau Tulafono ua o tatou pasia i le faagasologa mai o lenei Paeaiga. Ae o le faafetai a lou itumalo i lau Afioga i le Taitai ma le Faigamalo, e ala atu i le Minisita o Faamasinoga ma le Tamaitai Pule o le Matagaluega, mo le Tulafono ua aveesea mai ai i le faavaa ae tuu i totonu o le Faavae ia le tautinoga ua mautu ai ma aloaia ai Faavae i le Atua Samoa. Malo faafetai, o le Atua lea o lo o tatou faamoemoe i ai i se taimi aemaise i taimi faigata.

E le gata i lea lau Afioga i le Fofoga Fetalai, faafetai i le Afioga i le Minisita ma le Matagaluega i Tulafono foi nei e pei ona sa vavao ma tapisa ai le atunuu aemaise Tulafono ua mafai ai ona aloaia le aiatatau a tagata e toatele. Ia e pei foi la o le Pule mamalu a Alii ma Faipule na i lo le tulaga sa i ai na o le aiatatau a le tagata e toatasi, aemaise foi o le Tulafono o le a uma fanua o le atunuu ona faatau e le HRPP. O le a faoa eleele o le atunuu ma o le a faatau atu i Saina, ia e ese le faanoanoa, ae ua faafetai mai si ou itumalo.

Faafetai o lea ua faalogologo mai i le avatu i le Fonotaga lenei, e leai se mea faapea o tupu. Ia aua o la foi sa o latou faalogologo mai, o la e i ai le lui a lau Afioga i le Palemia o la sa faia. Afifio mai soo se isi lava, se i faasino mai po o gafea tonu pe i ai se laina, se upu o le Tulafono e faamaonia ai. Ia ou te le iloa i le Palemia, pe na oo mai se isi pe leai. Ae o lea ua mautinoa, ia o lea ua pasi ia lea Tulafono.

Faafetai tele foi, lau Afioga i le Minisita o Fesootaiga ma Faamatalaga ma Fesootaiga Vavave Faaneionapo, Ofisa ma le Matagaluega ua faapena ona sa i ai lava taimi sa leaga ai le faafofoga mai i Safotu aemaise le alu lea i luga o mauga ia ua faaleleia ma siitia i luga le auunaga a le Malo. Ua manino e le gata i faasalalauga i le leitio e faapena sa tau sue mea e te tu ai ona lelei lea o telefoni feaveai. Ua faapena ona manino atoatoa ia televise, ia aemaise foi fesootaiga televavave eseese, e le gata i totonu o Samoa, ae ua faapea ona faalelei ma fesootaiga ma atunuu mamao, ua mafai ai ona fesootai e le gata i le talanoa, ae o lo o vaavaai atu i foliga o nai o tatou aiga ma fanau, ia ma le tele ma anoanoai o faamatalaga ma vaai eseese mai i atunuu mamao, o lo o tatou matamata atu i ai ma molimauina ma malamalama i ai.

Ae o le faafetai tele lava na toatele na valaau mai, faafetai i le faaleleia o lea vaega, ona o lo o molimoli mai i faamatalaga aemaise mai i Niu Sila ma Ausetalia. Faafetai tele mai o lea ua mafai ona tuusao atu Tualumaga o le Fono a le Palemene, ua o latou manino ma malamalama ai, i le tele o faasalalauga sese ma le faavaea, ma tuuaiga sese agai i le Faigamalo, o lo o faasalalauga atu e se vaega toaititi lea ua amata fefulituaai Samoa o lo o alaala i atunuu i fafo. E pei ona tatou molimauina atu i upega tafailagi, aemaise...

**Tofa Olo Fiti Afoa Vaai:** Lau Afioga i le Fofoga Fetalai...

**SUI FOFOGA FETALAI:** Malie lau Afioga i le Minisita, se i...

**Tofa Olo Fiti Afoa Vaai:** Faamalulu atu lava...

**SUI FOFOGA FETALAI:** Malie le sui usufono o tulai mai pe i ai se mea ua, se i saunoa...

**Tofa Olo Fiti Afoa Vaai:** Ia, o lea ua uma ona taoto le tulaga o le saunoaga a lau Afioga o le Nofoa o le Fofoga Fetalai i le... o le tele lava ia... ua ou fiu e faalogologo i le Afioga i le Minisita, se i saunoa sao i tulaga o ona matafaioi i le tatou Soifua Maloloina, po ua manaia po o ua a ma a, po o ua manaia.

Ae o le toe agai fua i i i mea ia o faasalalauga e pei e foliga e agai mai, se o le mea lea e tupu ai le pisa. E le aoaia e le matapia le manaia, aua afai o le

faiga lenei, e tutu atu foi le matou vaega, e fai atu foi ni tala, e ono vevesi ai foi lea o le tatou Fono.

**SUI FOFOGA FETALAI:** Malie le sui usufono, ua maua lou finagalo, ia o lea foi ua faafofoga mai ia le Minisita, ia ae tusa ma le fautuaga. Ia ou te tapa lau Afioga i le Minisita o le Soifua Maloloina, ia faaauau lau saunoaga.

**Tofa Hon FAIMALOTOA KIKA IEMAIMA STOWERS:** Faafetai i lau Afioga i le Fofoga Fetalai, o lea e pei ona ou fai atu i le amataga se i faatea atu lava mea tau i si ou itumalo, ma manaoga ma faafetai. O le mafiafia ia o le sauniga a lau Matagaluega, masalo ou te lauga ai i le aso atoa taeao, o lea ou te uuina pepa mafiafia ia...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai...

**SUI FOFOGA FETALAI:** Ia malie le Afioga i le Minisita se i tuu atu le avanoa i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Se ua lava ia mea i lou itumalo ae sau ia i lau Matagaluega.

**Tofa Hon FAIMALOTOA KIKA IEMAIMA STOWERS:** Ia, o le tulaga lena, leaga e faigata e faafogafoga mai ia si o matou itumalo e valaau mai foi tagata i nai o matou tagata Savaii o a ea nei mea e tutupu mai? O a nei ia ae ua lelei, o au e ese le augofie e usitai i le faatonuga, ae o lagona na. Ia o le isi lava tulaga foi lea... o au ou te le facebook seiloga lava e omai ia, tilotilo foi lea mum i le mea lea. O lau fanau e faasino mai, leaga ou te le fia faia na mea ou te ita ai fua, ma tiga ai lou ulu, ae e le faia lau galuega e tatau ona fai.

Lau Afioga molimoli mai foi le faafetai tele aemaise le lagolagoina e lenei itumalo o le Tala o le Tupe o lo o tatou lauliliuina nei. Faafetai tele mo le saunia maeaea, manino ma maioio Tupe Maua ma Tupe Faaalu i lea mea ma lea mea. Ia toe pau lava ia o nei mea, laititi lava e faaleo ai ni talosaga o si ou itumalo, ona ou see loa lea i le matou Matagaluega.

E le tagisa si ou...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, aua e te popole i na mea. O mea a tatou o mea na e aumai i totonu o le Kapeneta, ae agai loa i lau Matagaluega.

**Tofa Hon FAIMALOTOA KIKA IEMAIMA STOWERS:** Ia, ua lelei. O lea o le a faia le finagalo o le Taitai o le Maota.

**SUI FOFOGA FETALAI:** Malo, malo i lau Afioga i le Minisita, see mai loa i totonu le sa, ma agai mai loa i le tulaga o le Matagaluega, ia ma ana galuega faatino.

**Tofa Hon FAIMALOTOA KIKA IEMAIMA STOWERS:** Lau Afioga i le Fofoga Fetalai, ae e le i amatalia le folasaga, ou te faamanatu atu, e na o le toa-2 lava nai sui usufono mamalu na afea ia lo matou Matagaluega. Ia ae o le toatele lava o sui usufono mamalu na sausaunoa, ia o le molimoli mai lava lea o le faafetai tele o suiga lelei aemaise o le faafetai tele ona o lo o saogalemu pea Samoa i le Koviti-19.

Lau Afioga i le Fofoga Fetalai ma lou agaga faaaloalo, ia seivagana la e te faatonu au ou te tali i ai, ia ona fai lea o lau faatonuga. Ae o le a amata le folasaga a si o matou Matagaluega.

**SUI FOFOGA FETALAI:** Ia saunoa loa i le folasaga a le Matagaluega.

**Tofa Hon FAIMALOTOA KIKA IEMAIMA STOWERS:** O le manulauti lau Afioga i le Fofoga Fetalai ma le Palemene e pei ona faataoto mai i le Taiala o Atinae a Samoa, 2016/2017 i le 2019/2020, e faapea mai, unai atinae ma ia faatupulaia avanoa mo tagata uma. Accelerating sustainable development and broadening opportunities for all. O i, sa faavae mai ai le manulauti lautele o le Soifua Maloloina, ina ia maua se Samoa maloloina, a Healthy Samoa, aua e le mafai ona tupu, ma ola atinae ma maua avanoa e tagata uma, pe afai e faaletonu le soifua maloloina i lona tafatolu. Soifua maloloina o le tino, le mafaufau, ia aemaise foi o le agaga. E talitonu le agaga, o le mafuaaga foi lea o le avea o le soifua maloloina ma se tasi o vaega ua ave i ai le faataua ma le faamuamua a le tatou Malo i tausaga uma lava, ona o le naunautaiga ina ia siitia le tulaga o le soifua manuia ma le maloloina o nai o tatou tagata.

Ae le i oo atu sau faamatalaga i galuega ma polokalame faatino a le Soifua Maloloina i le 5 tausaga ua mavae. E muamua ona ou momoli lau faafetai ma lau faamalo i lou uso a Minisita o le sa amatamea i lenei Paeaiiga i le taitaiga ma le mataituina o le faafoeina o auaunaga ma polokalame faatino a le Soifua Maloloina, lau Afioga ia Tuitama Leao Dr. Talalelei Tuitama o le o lo o seei mai nei i le tulaga Minisita o le Matagaluega o Tina ma Tamaitai, Atinae o Nuu ma Afioga ma Agafesootai. Faamalo onosai malo le finau mo le soifua manuia o si o tatou atunuu.

A o lenei taimi lau Afioga i le Fofoga Fetalai ma le mamalu o le Palemene, o le a ou agai tonu loa i le tuuina atu o se folasaga e faatatau i galuega ma polokalame faatino a le Soifua Maloloina. E 4 Tulafono Autu o lo o

limataitaiina ai galuega ma matafaioi a le Soifua Maloloina. Tulafono a le Matagaluega o le Soifua Maloloina 2006, Ministry of Health Act 2006. O le Tulafono lona 2 o le Tulafono o le Auaunaga o le Soifua Maloloina 2014, National Health Service Act, o lea ua soloia talu ai ua tuu faatasia nei le Matagaluega i le teuteuga o le Tulafono o le Matagaluega o le Soifua Maloloina 2006 i le Tulafono lea na pasia 2019.

3. Tulafono o le Faalapotopotoga Faavae tau Fatugao a Samoa 2005 – National Kidney Foundation of Samoa Act 2005. I le ma le lona 4, o le Tulafono o le Soifua Maloloina 1959 – Health Ordinance 1959.

E i ai isi Tulafono o lo o limataitaiina ai galuega ma auaunaga mo le soifua maloloina lautele e pei ona i ai. Muamua, Tulafono o Taumafa 2015 e mataituina ai le saogalemu o taumafa o lo o faaaogaina mo le fofoga taumafa o le mamalu o le atunuu.

2. Tulafono o Puipuiga mai Aafiaga o le Tapaa 2008 e tuutiitia ai le taumafa tapaa.

3. Tulafono o le Soifua Maloloina o le Mafaufau 2017 e limataitaiina ai auaunaga faatino mo le soifua maloloina o le mafaufau.

4. Tulafono Faatonutonu faava-o-Malo o le Soifua Maloloina 2005 mo le faafoeina o auaunaga o le soifua maloloina i uafu ma malae vaalele faava-o-Malo e mataituina ai vaega e ono limataitaiina ai le soifua maloloina o le atunuu.

5. Tulafono o puipuiga e taofia ai le ofi mai ma le salalau o faamai, puipuiga malu mai meaola faalafua ma faamai 2005. I le ma le 6, Tulafono o le Soifua Maloloina 1959.

Lau Afioga i le Fofoga Fetalai ma le mamalu o le Palemene, o lo o faapea foi ona i ai isi Tulafono e faatulafonoina ai le faatinoga o auaunaga o tomai eseese o le soifua maloloina e aofia ai Tulafono o Auaunaga o Tomai Faapitoa lagolago o le soifua maloloina 2014, Allied Health Professionals Act, o le Tulafono o le faamauina ma tulaga faaitiitia ma tomai faapitoa tau soifua maloloina 2007 e limataitaiina ai le faamauina ma le faataatiaga o alafua o auaunaga mo tomai faapitoa uma o le soifua maloloina. O le Tulafono o Fomai 2007 e limataitaiina ai galuega faatino a fomai uma.

O le Tulafono o Tausisoifua ma Faatosaga 2007, e limataitaiina ai galuega faatino a Tausisoifua ma Faatosaga. Tulafono o auaunaga mo oloa po o nifo, e limataitaiina ai le faatinoga o auaunaga mo nifo. O le Tulafono o tomai tau vailaau ma fualaau mo togafitiga 2007, e limataitaiina ai auaunaga faatino tau i vailaau ma fualaau mo togafitiga.

Lau Afioga i le Fofoga Fetalai, o nei Tulafono uma na limataitaiina ai le fausiaina ma le tapenaina o faiga faavae, o alafua ma tapenaga alualumamao o le soifua maloloina e faafoeina ai galuega ma polokalame na faatino i le 5 tausaga.

O nisi la nei o faiga faavae ma alafua ma fuafuaga alualumamao na fausiaina ma faataatitia ma faatinoina i lenei Paeaiaga. Faiga faavae 1, faiga

faavae mo tui puipui i Samoa 2021-2025. O le faiga faavae lenei e limataitaiina ai le faafoeina ma le uunaia o le faatinoga o tui puipui o fanau faatasi ai ma isi tui puipui fou e aofia ai ma le tui puipui o le Koviti-19.

2. Faiga faavae mo le faafoeina o gasegase tuuina atu i fafo mo togafitiga – National overseas medical treatment scheme policy and plan of action 2019 mo le faafoeina o le auina atu o gasegase i nuu mamao mo togafitiga e le o mafai ona faatinoina i Samoa nei.

Faiga faavae o le faafoeina o faasea ma faitioga mai gasegase ma i latou o lo o faaaogaina auunaga o le soifua maloloina 2015 e limataitaina ai galuega faatino mo le iloiloga ma le faatautaia o suesuega faa-soifua maloloina e faatatau i mataupu ma faafitauli e faasea mai ai le mamalu o le atunuu.

Faiga faavae mo le tuuititia o le taumafa tapaa 2019-2014, e limataitaina ai galuega ma polokalame faatino e tuuititia ai le taumafa tapaa. Faiga faavae o auunaga a le soifua maloloina i totonu o aoga 2018, e limataitaiina ai le faatinoga o auunaga faa-soifua maloloina mo fanau aoga faapea foi ma le tuliloaina o le siosiomaga tumama. O faiga faavae mo le HIV aids o lo o mataituina ai le faatinoga o auunaga mo le tuuititia o le mamalu o le atunuu e aafia i le HIV aids. Faiga faavae mo le soifua maloloina o le soifuaga fanau 2018-2023, e limataitaiina ai le faafoeina o auunaga mo le soifua maloloina o le soifuaga fanau.

**SUI FOFOGA FETALAI:** Malie le Afioga i le Minisita o lo o saunoa, se i tuu atu lava le avanoa i le sui usufono o Lotofaga.

**Afioga Hon Fiame Naomi Mataafa (Lotofaga):** Faafetai. O se mea e fia malamalama lau Afioga. O lea ua faalogologo ma le totoa i le folasaga a le Afioga i le Minisita. O lea la e maua atu o lo o faasolo mai faiga faavae a le Matagaluega. O le matau atu o lo o faamalau mai ia faiga faavae ma o latou uiga. Ou te le iloa la pe i ai se taimi e faalauaitete mai ai e le Afioga i le Tamaitai Minisita taunuuga ma aiaiga o ia faiga faavae pe na o le faamalau mai lava o lea e i ai le faiga faavae. Faamolemole lau Afioga.

**SUI FOFOGA FETALAI:** Faafetai o lea ua... ia se i saunoa lau Afioga i le Minisita mo le Soifua Maloloina.

**Tofa Hon FAIMALOTOA KIKA IEMAIMA STOWERS:** E pei lava ona faafofoga mai lau Afioga i le Fofoga Fetalai i Tulafono na mafua ai ona faia faiga faavae mafua ai ona faataatia fuafuaga alumamao mo le faatinoina. E le mafai ona faagasolo galuega pe afai e ... o lea e faafofoga mai le Ofisa Sili o Pulega o le Matagaluega o mea ia ua maea ona faataatitia a i ai se isi e fia maua sana kopi o lea faiga faavae ma lea plan of action, e maua mai i le Matagaluega. Pei o le tulaga lena e tali atu ai le fesili, aua e le mafai ona

faafoe pe a leai ni Tulafono ma ni faiga faavae ma fuafuaga e faatino ai ni Tulafono. Faaauau...

**SUI FOFOGA FETALAI:** Malie lau Afioga i le Tamaitai Minisita, o lea foi ua toe tulai mai le Afioga i le Sao Faapito. Se i tuu atu lava i ai le avanoa. Saunoa.

**Afioga Hon Fiamē Naomi Mataafa:** Faafetai i lau Afioga. E leai se agaga e faalavelave i le folasaga a le Tamaitai Minisita. A tau lava la pei ona momoli atu muamua, pei na o le folasaga lea e aumai i le faiga faavae ae leai sana saunoaga e aumai e faalautele ai. A faapea la na o le faamalau le mea lea e fai mai nei, pe o le taimi la lenei e tutulai atu ai e fesili atu ai i ana faiga faavae lea ua faamalau mai. Pe na o le pau lena o le avanoa e malamalama ai ma faalauaitete ai se mataupu, ona o au o se tasi o sui usufono sa talanoaina le mataupu i le soifua maloloina i lau lauga.

**SUI FOFOGA FETALAI:** Masalo o lea ua... Faafetai i le sui usufono mamalu. Lau Afioga i le Minisita o lea e manino lava le saunoaga. Se i aumaia lava sau saunoaga e faamanino ai mea ia i le taimi e talatala ai faiga faavae lea e te tolaulauina i le tulaga ua maea ona faatino, o lo o faapena ona faaleleia ai tulaga uma o isi vaega ia o le auaunaga.

**Tofa Hon FAIMALOTOA KIKA IEMAIMA STOWERS:** O vaega ia o faiga faavae ma fuafuaga alualumamao ua faataatitia ma o lo o faatino ai galuega o lo o faagasolo. E i ai se taimi ona ou oo atu lea i mea o isi mea o lo o faagasolo e pei ona ua maea ona pasiaina ma o lo o taumafai le Matagaluega e faatino.

**SUI FOFOGA FETALAI:** Ia lea la ua tali le fesili. Malie le sui usufono o lea la ua saunoa le... e i ai se taimi ona oo lea e talatala le mea lea e te atugalu ai ae malie le sui usufono...

**Afioga Hon Fiamē Naomi Mataafa:** Faafetai i lau Afioga, ae se i avatu pea e faamauiina ane i tafatafa o le Minisita o lo o saunoa. Ou te fia malamalama i le faiga faavae o tui puipuia. Faafetai.

**SUI FOFOGA FETALAI:** Ia se i tuu atu lava le avanoa i le Afioga i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e taua tele le fesili a le tamaitai faipule. Faatoa alu ese nei mai lava i totonu o le Kapeneta, ae ou te le i faalogo lava i totonu o le Kapeneta o

fesili i mea ia. Ae lelei foi e faatupu manatu, atonu foi o lea o le a agai tonu i ai, aua o faiga faavae e mulimuli ai galuega e fai. E malamalama i ai le sui tamaitai sa fesili nei, ua leva ona saofai ai i totonu ae le fesili lava i ia mea. A o lou fiafiaga, ua alu ese atu loa faatoa fesili. Ae manaia lou agai i ai i tulaga ia i le taimi e faasolo mai ai le saunoaga ia ma agai tonu loa i ai i le taunuuga lea e fia silafia e le sa saofai i totonu o le Kapeneta mo nei tausaga e tele ma faalogologo i pepa e aumai mai le falemai.

**SUI FOFOGA FETALAI:** Faafetai i le saunoaga i lau Afioga, o lea ua faamanino ma avatu foi le fautuaga. Tuu atu le avanoa i le Afioga i le Minisita mo Fesootaiga.

**Afioga Hon Afamasaga Lepuia Rico Tupai:** Leai lau Afioga ou te tulai atu ma le faaaloalo i lailoa le Afioga i le Tamaitai Minisita ae tusa ai ma tatou faiga faavae foi lele pes a lauga ai i le taimi sa lauga ai le sui usufono mamalu. Faafetai.

**SUI FOFOGA FETALAI:** Ia faafetai. Ona o lea e aumai le faamalamalama e le Afioga i le Minisita, o le a le afaina lea. Saunoa lau Afioga i le Minisita.

**Tofa Hon FAIMALOTOA KIKA IEMAIMA STOWERS:** Ia e pei lava ona ou fai atu, a ou sau nei e aumai uma nei faiga faavae, lona uiga e atoa le 6 masina o faitau atu faiga faavae ma tulaga lea e i ai. Ae ou te talitonu lava leaga o lea sa tau lagalaga mai foi, masalo o lea ua fesili i le tui puipui. Ou te talitonu lava o lea e tau lagalaga mai lava le misela. E pei foi ona tulai le Afioga i le Taitai e faaopoopo mai i lona aso, o tui puipui o lo o faagasolo i le taimi nei, e le gata o le misela lea ua 96% ua maea ona tui, a o lo o faagasolo isi tui puipui pe a ma le 10 isi tui puipui lea o lo o faagasolo i falemai uma.

**SUI FOFOGA FETALAI:** Malie le Minisita se i tuu atu le avanoa i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, lona la o la e ua 96%. O le mea tonu lona o la e manaio ai le sui usufono, o le taunuuga ma le aofai o tagata na feoti e 83. O le mea lona o la e fia manaio i ai, o le taunuuga ma tagata na tui. E faigofie lava le mataupu ae se i e taunuu i ai pe a maea le tolaulauga o faiga faavae leaga e taua tele faiga faavae e mulimulitai i ai gaioioiga o fai.



**SUI FOFOGA FETALAI:** Faafetai. Malo mo le faamaninoga e lau Afioga i le Taitai o le Malo, ae faaauau pea le saunoaga a lau Afioga i le Minisita mo le Soifua Maloloina.

**Tofa Hon FAIMALOTOA KIKA IEMAIMA STOWERS:** Faafetai mo lau Afioga. Ia o lena ua faamalamalama atu. Tui puipui, o lo o faagasolo i le taimi nei i falemai uma lava i Upolu ma Savaii. O lena foi ua maea ona fofu e le Malo le faafitauli na tupu mai i misela e ala i le tui puipui lea o le misela. A lea ua pasia i totonu i i le fofu na fai e le Malo ina ia aua aua ne i toe tupu mai le mea lea, le Tulafono lea na tatou faaigoaina nei o le Tulafono o le Alofa, e le toe talia ai se tamaitiiti e amata atu i aoga amata seia pai lava i luga ona toe ulufale i se aoga vagana ua atoa uma ona tui puipui. Ia o le faiga faavae la o le tui puipui lena ua faamalamalama atu. Ia a o faasolo atu ma isi mau...

**SUI FOFOGA FETALAI:** Malie le sui usufono o saunoa se i saunoa lau Afioga i le Sao Faapito.

**Afioga Hon Fiamē Naomi Mataafa:** Lau Afioga i le Fofoga Fetalai, a faapea... Faafetai. O lau lauga i le mataupu o le misela, o faailoilo i le taimi na amata ona oo mai ai le misela, ma le taua o le i ai o le tomā i totonu o le tatou auunaga faale-soifua maloloina e faitauina ai faailoilo nei. Ou te le toe tau fai atu i saunoaga foi a le Afioga i le Palemia ma le Afioga i le Minisita. Ae talu mai lau lauga, o lea ua faasalalau nei le Lipoti a le Komisi na suesueina le maliliu o pepe nei e toalua na tui. Ona ua faasalalau faalauaitete, o lo o tau mai ai i le lipoti lea, na aumai le fautuaga a le Komisi, ina ia fai se tuiga tele mass vaccination e puipuia ai le atunuu ona e maualalo le faitauaofai o tagata ua oo i ai le tui ua pau tele. E le gata i le fautuaga a le Komisi ae o lo o aumai ai foi i le Lipoti lea sa i ai le fautuaga a le Sui Pule o le Matagaluega e fai foi le tuiga tele lea.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le mea e fia faasao.

**SUI FOFOGA FETALAI:** Malie le sui usufono o lo o saunoa se i tuu le avanoa i le... se i toe faamanino mai e le Taitai o le Maota.

**Afioga Hon Fiamē Naomi Mataafa:** Po o le mea la faamolemole, se i faauma atu pea lau tala. Ma e 2 la fautuaga faamaumauina o le Lipoti a le Komisi ma le Matagaluega tele lava o le Soifua Maloloina ia ua tatau ona fai se tuiga tele lea. Na fai ia Mati 2019.

**SUI FOFOGA FETALAI:** Malie le sui usufono o lo o saunoa se i maea ona toe tuu atu lea o le avanoa. E i ai mea ia e fia faasao i lau saunoaga.

**Afioga Hon Fiamē Naomi Mataafa:** Maliliu pepe faatoa fai ai loa le tuiga tele mulimuli lea na fai, ae ua maliliu pepe e 83.

**SUI FOFOGA FETALAI:** Malie lau Afioga i le Sao Faapito ua faalua ona ou fai atu, ia alaala mai i lalo. Se i tuu atu le avanoa i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le mea e fia faasao, o le fesili lea na fesili mai ai, e fesili mai e faataga le iloa a o la e ua toe tali lava e ia. E matua maoae nei mea, a o lea sa saofai ai i totonu o le Kapeneta ma na silafia ai le Komisi lea na fai i ai le matou faaiuga e fai le Komisi. Lea foi sa silafia le tulaga o le le mafai ona faatalitonuina le tele o tina e aumai a latou fanau e tui ona o le tulaga lea, seiloga e uma le Komisi. E fai lava si umi o le Komisi o faagasolo. Ia se i vaai la i ai, e faataga fesili a o la e na te iloa, aemaise sa i totonu o le Kapeneta. O le a le mea ua ala ai ona faapea? Lea sa fesili i le taunuuga, o le taunuuga lena, lena ua e talanoa mai ai. Lena e te talanoa mai ai i le tulaga o le faigata ona faatino le mea lea, ona o lea ua fefefe tina na ala ai ona ou fai atu, e le malamalama se tina e leai sana fanau, aua foi, na o le mafaufau, ae na te le o lagona i le faigata i le tina i le avatu tui lana pepe e ono oti ai, a o lea e le i maea le suesuega a le Komisi. Ia e manatua, na alu alu le suesuega a le Komisi ona suspend lea ona o le faamasinoga. Ae sa e saofai ai i totonu o le Kapeneta. O le a le mea na e le fesili mai ai ia te au? O le a le mea na e le fesili mai ai ia te au? Na o lou alu e mumumumu solo mumumumu solo mumumumu solo ae sa tatau ona e fesili mai ia te au i le taimi na fai ai tatou faaiuga ma e fia iloa pe aisea na feoti ai, aisea na sau ai le faamai.

Lau Afioga i le Fofoga Fetalai, o le ala lena na ou avatua ai le tali, e le mafai ona malamalama se tama po o se tina i le faigata ona gauai mai tina e tatui a latou fanau, ae le i maea le faaiuga o le Komisi lea faaumiumi sa fai. Aisea? na taofi le Komisi ona o lea ua faagasolo faamasinoga. Ua galo ia te oe? E le mafai ona e manatua leaga sa e taaloalo i lau telefoni a o lea e talanoa le Kapeneta i mataupu.

Lau Afioga i le Fofoga Fetalai, o le ala lena na ou fai atu ai, e te talanoa i mea pepe. A saga sasa lava lena solofanua ua mate? O le alagaupu lena e masani ai tiny togs.

Lau Afioga i le Fofoga Fetalai, o le fesoasoani atu lena i le fesili e faataga fesili. A o lea ua toe nofo lava ia ma tali.

**SUI FOFOGA FETALAI:** Malo saunoa i lau Afioga. Malie le sui usufono se i fai atu lava le faamatalaga a le Nofoa.

Ou te manatu ua atulasi, ua atufia ona faamalamalama ma faamanino le mataupu lenei, a o lea lava e saunoa i ai sui usufono ma toe saunoa i ai. O lea foi ua maea ona tuuina i tua, ua public le lipoti lea e te taua, lea e te saunoa i ai. O lona uiga, o lona e taoto ai i ina. O lea na saunoa le Afioga i le Tamaitai Minisita o le Soifua Maloloina, o lea e faagasolo, o lea ua faatino fautuaga. Ou te le iloa la po o le a le isi mea lea e tulituliaupu. O le mea lea malie le sui usufono, o lea lava e i ai le talitonuga o le Nofoa, e manino auofala i lau Afioga i le tulaga o lea e taoto ai le faamoemoe lea pei ona i ai le lipoti ma le fautuaga lea ua faatino e le Matagaluega. O lea e faaaau lava, faaaau. Ae i ai ona faafitauli e pei ona saunoa le Taitai o le Maota. E i ai ona faafitauli. E le faigofie foi le auaunaga a le soifua maloloina ina ia mafai ona ausia le faamoemoe o le lipoti. O lo o i ai faafitauli. O la e taumafai, taumafai ina ia tini ma tau lau o le faamoemoe. E pei o le agaga le e toe tau... ae ua atulasi le faamaninoga e le Malo.

**Afioga Hon Fiamē Naomi Mataafa:** Lau Afioga i le Fofoga Fetalai, e pei e faaaau pea le faauilavea foi lea i le saunoaga autu a le Minisita. O le autu o le fesili, a faapea ua le faia le tuiga tele lea i le taimi na aumai ai le fautuaga ia Aperila 2019 ona e faapea e le mafai ona uunaia tina e ave a latou fanau e tatui? O le a le le mea na mafai ai i le tuiga tele lea na 2 aso o galulue ai le Malo ma le afaigaluega? O le a le mea na le mafai ai ona fai ia Aperila ae mafai ona fai i le taimi mulimuli ane. O le galuega tele lona lea na fautua mai ai le Komiti. Aua a na fai i le taimi na fai mai ai, ailoga i se a e maumau soifua...

**SUI FOFOGA FETALAI:** Ia, o lea ua maua lou finagalo. Ae lelei ona silafia e lau Afioga i le sui usufono mamalu, o le tiute lea o le Malo. O lea na saunoa le Afioga i le Minisita, o lea foi ua fesoasoani le Taitai o le Malo pe a oo i faiga faavae faapea. O le latou tiute lea sa e i ai foi i le Kapeneta, e faapena lo outou galulue faatasi. O lona uiga, e taua foi le tulai mai o le Taitai o le Malo e atili malamalama ai mea uma. Ia tailo i ai, ae o lou talitonuga lea.

Se i tulai mai le Taitai o le Malo.

**Afioga Hon Fiamē Naomi Mataafa:** Faafetai i lau Afioga pei ua e faamalamalama maia mataupu a o lea ou te talanoa i le Minisita i le Minisita.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le mea lona o lea ou te faanoanoa ai, o le mea lea o lea ou te faanoanoa ai. O totonu o le Kapeneta...

**SUI FOFOGA FETALAI:** Malie lau Afioga i le Sao Faapito, ou te tatalo atu alaala mai i lou nofoa. Se i tuu atu le avanoa i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le mea ou te ofo ai, o le leva ona i ai i totonu o le Kapeneta, e nofo i lou itu taumatau ae leai lava se manatu na faaalua. O taimi uma sa i ai i totonu, e leai lava se manatu na faaalua, a o au o le Taitai o le Malo, o lea ou te galala, galala i au Minisita, a o i ai ni o latou finagalo, aumai le fautuaga. E leai ma se fautuaga na aumai ia te ia lea, leai ma se fautuaga. O lea e molimau Minisita nei o le Kapeneta e leai ma se leo na faaalua i le polokalame atoa. Pe faitio mai ai, o le a le mea ua le faia ai ni tui? O le a le mea ua le faia ai ni tui? E leai ma se leo e tasi. A o lea ua te i lava ua atamai ina ua sau i fafo o le Kapeneta. O a la ituaiga Minisita faapenei?

Lau Afioga i le Fofoga Fetalai, o lea na taoto lelei fuafuaga a le Malo, e oo i tui na o i tua, fai. E uma ane le tuiga, a lea na saunoa i ai le Minisita mo Tina ma Tamaitai. Alu le tatou polokalame sa e saofai ai i totonu ae lipoti mai e 2,500 i latou e mumusu e tui, lea faatoa maua mulimuli ua faamalosia e tui.

Lau Afioga i le Fofoga Fetalai, e le mafai le mafai ona malamalama i ai se toeaina po o se tina e leai sana fanau.

**Afioga Hon Fiamē Naomi Mataafa:** Lau Afioga i le Fofoga Fetalai, e te aumaia le faatagaga ou te faasaoina ai le Palemia?

**SUI FOFOGA FETALAI:** Se i uma ona tuuina atu lea o le avanoa.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E leai sana fanau, aua na te le lagona le danger, e lamatia le ola o lana tama e ave e tui, e ave e tui. O le ala lēna mai lava i le taimi na tulai mai ai le mea lea i Savaii. Sa ou talanoa foi i isi tina ua omai fai mai ia te au, matou te mumusu e tui, o le a matou o i Niu Sila e tatui ai. Totogi pasese o i Niu Sila e tui ai, ua le talitonuina le tui lea, e aofia ai ma latou foi sa fai le talaiga e le tataua ona tui e dangerous le tui.

Lau Afioga i le Fofoga Fetalai, e pei o se mea ua leva ona manino le mea lea. Ae o le mea ou te ofo ai, saofai i i le taimi umi sa i ai, ae faatoa tautala ina ua sau i fafo? O le a la le ituaiga Minisita e i ai oe?

**SUI FOFOGA FETALAI:** Ia, se i tulai mai lau Afioga i le sui usufono mamalu o Lotofaga i le mea e fia faasao.

**Afioga Hon Fiamē Naomi Mataafa:** Faafetai. I le Palemia?

**SUI FOFOGA FETALAI:** E tusa ma lau saunoaga.

**Afioga Hon Fiamē Naomi Mataafa:** Faafetai. Ia o le lafoga lenei na ia faapea e leai ni fesili na avatu, ai e galo i le Palemia le matou aiga Kapeneta. Fesili atu i le Minisita e ou le Matagaluega, o le a le mea lea e tupu? Ae sau le faasilasilaga, lea foi na faaleo e le Ofisa Sili o Pulega, e leai se mea e popole ai. Fia masina o le tali lava lea? E leai se mea e popole ai. O le tali lena na aumai totonu o le Kapeneta. O le a la le isi talanoaga lea e manao ai le Palemia?

**SUI FOFOGA FETALAI:** O lea la ua maua atu lou finagalo na fia faasao. Ou te manatu ua manino auofala i lea vaega. Ia saunoa lau Afioga i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielega:** Lau Afioga i le Fofoga Fetalai, o le a ou faatali se i uma le faipule lea ona ou tulai atu ai lea.

**SUI FOFOGA FETALAI:** Ia, tuu atu le avanoa i le sui usufono mo Faasaleleaga Nu.1 Sisifo.

**Afioga Hon Gatoloaifaana Amataga Alesana Gidlow (Faasaleleaga Nu.1 Sisifo):** Lau Afioga i le Fofoga Fetalai, faafetai mo le avanoa. I lou tulai atu o au o le Taitaifono o le Komiti sa iloiloina le Lipoti lea o le Misela, ma ua uma ona faataatia i le Maota Fono le matou lipoti ma le matou fautuaga. O le manaia ia o matou fautuaga na ua tuuina atu, aua e lagona, o le taimi lenei lau Afioga i le Fofoga Fetalai, o le taimi o le alu agai i luma. E leai se aoga tatou te taetaeina ai mea ua tuanai. Vaavaai po o a faavae ia pei ona saunoa i ai le Tamaitai Minisita, mulimulitai i faavae na lea o lo o i ai i totonu o matou lipoti. Mulimulitai, tulituliloa ia aua ne i toe tupu le mea lea na tulai mai. O le feau taua, tatou agai i luma, e leai se mea e toe tusitusilima ai, tatou o e tuli se aim o le lumanai. Tagai i le matou lipoti o fautuaga uma lava na ua sipela atu e tatau ona faaogaina e limataitaiina ai foi le mamalu o le tatou Matagaluega i se fautuaga aua le tatou alualu i luma o le tatou galuega. Faafetai mo lou avanoa.

**SUI FOFOGA FETALAI:** Ia malie le sui usufono mo Lotofaga se i ou taumafai atu. Ua ou manatu sa tuu atu lava le avanoa o le agaga e i ai se mea taua o fia fautuaina e lau Afioga aua le faamoemoe o le saunoaga a le Minisita. Ae peitai o lea e foliga mai o lou lava lea finagalo e taumafai ai e tatau i ai le faamoemoe tele o le Malo o lea ua maea ona fai le lipoti. O lena ua manino, ua tatau foi ona e silafia tulaga uma o fautuaga, ua uma ona tuuina atu i le lipoti, e pei ona e saunoa i ai.

O le faaiuga a le Nofoa, o lea ua manino le tali a le Malo, e te silafia foi le mea lea ou te taumafai atu ai. O le tali a le Malo, o le faaiuga lena o se mataupu o lo o faasoesa ai le sui. Malie lau Afioga i le sui mamalu, sa ou tuu atua le avanoa ma le agaga e fia tulituli ni agaga lelei mo le faamoemoe. O lea ua saunoa le Taitaifono na feagai ma le Komiti, e le o le matagofie. O le agai i luma o le atunuu i le tulaga o le saogalemu ina ia aua ne i toe tulai mai faafitauli ia. Ae le mafai ona tatou toe tepa i tua. O le mea la lea, malie lau Afioga, o lea ua ou fai atu tatou o ia e faamuta le mataupu. Ae faaauau le saunoaga a le Afioga i le Minisita.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai,

**Afioga Hon Fiamē Naomi Mataafa:** Ua ou talia le faatonuga a le Nofoa. Ae na o le pau lava le mea i le saunoaga a le Taitaifono o le Komiti lea sa nafa ma le lipoti. E sese le maliu lea e tagi ai. O le lipoti lea e saunoa i ai, o le lipoti a le NEOC, o le lipoti lea ou te fai atu ai, o le lipoti a le Komisi sa suesueina le maliu o pepe e toa-lua.

**SUI FOFOGA FETALAI:** Faitau le lipoti lena e manino lelei ai, ae o lea ua tali le Malo e tusa o le faamoemoe o le lipoti lena. Faafetai.

**Afioga Hon Gatoloaifaana Amataga Alesana-Gidlow:** Lau Afioga i le Fofoga Fetalai, po o le lipoti a le NEOC po o le lipoti a le FIOC, o le lipoti a le misela.

**SUI FOFOGA FETALAI:** Ua ou faia le faaiuga, faafetai. Se i tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Ua ou talia lau fautuaga, ma o lea foi ua saunoa le Taitaifono, ma o ituaiga fautuaga ia e aoga mo le agai atu i le lumanai. A o le mea lea ou te iloa o lea e tulituliloa, aua o uiga ia o le Kapeneta, e aumai fesili i lea Minisita aumai le tali. O le tali lava lena. Ae a fai e i ai se manatu e lagalaga i totonu o le Kapeneta, ona agai foi lea o le talanoaga, ina ia saili lava, matua saili lava, ia oo lava i le ooooga. Ou te le i maua se fesoasoani faapena, mai le sui tamaitai, o lo o toe lagalaga nei mea. Ae a fua le lagalaga e le lelei le loto.

**SUI FOFOGA FETALAI:** E masalo o lea ua saunoa le Taitai o le Malo, e faapena lo tatou sii i le Atua le faamoemoe, o le Fonousu a le atunuu. O lea foi ua tatou oo mai i lenei afiafi, o lagona lava ia. Ia fale i le fale o le

Atua o outou finagalo. O lea ua faamanino atu e le Malo tulaga o tatou Tulafono tumau. O le faaiuga o le mataupu o le Malo. O le mea la lea, faafetai i le sui usufono, i le malamalama ma le manino i tulaga uma o lo o tausi ai le saogalemu o le Maota.

E talu ai, o lea ua tatou taunuu tonu lava i le taimi e manava ai tatou Galuega o le ta o le 10. O le mea lea, a e tatou te le i manava i lenei afiafi, ou te talosaga atu i le sui usufono mo Faleata Nu 1, e te saunia se tatalo e faamaea ai galuega o lenei afiafi.

*Na tolopo Taulumaga a le Fono Aoaofaitulafono i le itula e 10:04 i le po seia aulia le Aso Faraile, 26 Fepuari 2021 i le itula e 9:00 i le taeao.*